

ASO LUA, 03 ME 2022

Na nofoia e le Fofoga Fetalai le Nofoa i le itula e 9:31 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaio Faitulafono.

O lea ua tea i lagi le viiga ma le faafetai, ua maea foi ona uia le alapae i le Nofoa paia o le Atua Silisili Ese ma Lona agalelei, tatou te faafetaia ai pea Lana faaiuga lilo i o tatou vaivaiga faale-tagata, a o faaauau ai pea la tatou folauga i lenei vaitau o le tausaga. Ia maua pea Lona viiga i o outou finagalo ma o tatou loto. O mamalu faalupe ma sa e le avea o lenei taeao, o le a taoto faa-sugalufale o le Punialavaa, e pei o upu i le gataifale o le Vaimauga.

Ou te muai faatulou ai i paia e le tutumulivaiina e faigata le Fonousu a le atunuu e ala i lana Palemene. I le afio o lau Afioga i le Tamaitai Palemia, lau Afioga i le Sui Palemia ma le mamalu o le Kapeneta, ae a le afio o Minisita Lagolago.

Afio foi lau Afioga i le Taitai o le Itu Agai ma le Sui Taitai ma sui usufono mamalu uma o le Palemene. Malo le soifua manuia i lenei taeao fou. Tatou lafoai i le Atua le faamoemoe o lenei aso, na o Ia tatou te mafaia ai mea uma, na o Ia foi e lelei ai mea uma.

Le tapuaiga a lau Afioga i Le Ao Mamalu o Le Malo ma lau Masiofo, lau Afioga i le Sui Tofia ma lou faletua, lau Afioga i le Faamasino Sili ma le mamalu o le Faamasinoga, e ofo alofa atu ma faatalofa atu lau Palemene i lenei taeao.

Le paia o le atunuu i Aiga ma latou Tama, Tama ma Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti, ua faamalo le soifua manuia i lenei taeao fou.

E faatalofa atu foi i Faauluuluga o Ekalesia Kerisiano uma i le atunuu, le aufaigaluega faauuina o le Talalelei, malo le lagi e mama ma le soifua manuia.

E faatalofa atu foi i le aufaigaluega a le Malo ua tatou mafuta i lenei taeao, lau susuga i le Loia Sili ma lou auvaa, le Ofisa Sili o Pulega o le Matagaluga o Pisinisi, Alamanuia ma Leipa ma lou auvaa, taeao manuia, malo le onosai. Ia manuia le alofaiva o le Palemene i lenei taeao, manuia le tapuai mai a le atunuu.

ISI FAASILASILAGA A LE FOFOGA FETALAI

FOFOGA: O le aso Faraile 29 o Aperila 2022 na ou faailoaina atu ai se faitioga tusitusia e faatatau i le lagaina o se mataupu tau tulaga aloaia e tusa ai ma Tulafono Tumau a le Palemene. Sa i ai le fuafuaga o le aso Fono lenei e tuuina atu ai le faaiuga a le Fofoga Fetalai i lenei mataupu, peitai, e le i maea iloiloga a le Nofoa i itu taua o lenei mataupu.

Ou te faamalulu atu ai i le paia o le Palemene, o le a mafai ona tuuina mai le faaiuga pe a maea iloilo vaega taua uma mo se faaiuga talafeagai.

LAFO A LE TAITAI O LE MAOTA

FOFOGA FETALAI: Ou te tapa lau Afioga i le Palemia.

Afioga Hon FIAME NAOMI MATAAFA (Palemia): Faafetai i lau Afioga i le Fofoga Fetalai. E faatalofa atu i le paia maualuga o le Maota o Samoa i lenei taeao, malo le lagi e mama ma le soifua maua, ua alafai mai le Maota i faguga lelei i le alofa ma le agalelei o le Atua.

Lau Afioga i le Fofoga Fetalai, ou te faatu le lafo, *E tusa ai ma Tulafono Tumau 47, ina ia faaauau Galuega Tuua a le Palemene mai le Tauaofiaga 2021/2022 i le Tauaofiaga 2022/2023 e pei ona tusia i le Pepa Faaopoopo o Galuega Nu.1, 2022/2023.*

Faaluaina e le Sui Palemia ma le Minisita o Faatoaga ma Faiga Faiva.

Na faamaonia le lafo.

TULAFONO TAU FAAOFI O TEUTEUGA O LE TULAFONO O SOOTAGA VA LELEI O LEIPA MA GALUEGA 2022 – felafolafoaiga faaauau i luga o le faitauga faalua mai le aso Fono muamua

FOFOGA FETALAI: E tolopo a tatou taualumaga i le aso Faraile 29 o Aperila 2022, ua maea ona saunoa le sui usufono mo le itumalo Palota o Vaimauga 2.

Ia, o le avanoa lenei mo se isi sui usufono e fia saunoa i le tatou Tulafono Tau Faaofi. Ia, o lea ua matau atu o lea ua fou mai le sa o le sui usufono mai Faleata 3, ia o lou avanoa lenei.

Tofa LEALAILEPULE RIMONI AIAFI (Faleata 3): E muamua ona momoli le faafetai tele i lau Afioga i le Fofoga Fetalai i lenei taeao

matagofie, aemaise foi o tatou talosaga molia i le tatou Matai Sili i le lagi i Lana tausiga ma Lona alofa faifaipea mo si o tatou atunuu pele o Samoa, aemaise foi o le tatou Maota Fono nei i sui usufono mamalu na faia mai le fuifui aua Samoa.

E faatulou ai i lau Afioga i le Fofoga Fetalai, lau Afioga i le Tamaitai Palemia, Minisita o le Kapeneta aemaise Minisita Lagolago. E faatalofa foi i lau Afioga i le Taitai ma le Sui Taitai ma le paia ma le mamalu o lenei Vaega Faaupufai. A o le faafofogaaga a Samoa i ona tulaga faalupe, le aufaitatalo ma le aufailotu, ma Samoa i ona mauga tetele seia oo i fanau iti, malo le soifua maua, malo le lagi e mama, malo le tapuai.

Ia, faafetai foi i lenei taeao, o le a le oo se tala i le tulaga, ia ae fesoasoani le Atua i lau Afioga ma tulaga uma o le faafoega o le tatou galuega ma le tatou Maota Fono. Ae o le a fai se manatu puupuu i le tatou Tulafono.

Faafetai atu i le Afioga i le Minisita e tusa ai o lenei Tulafono. O se Tulafono aoga tele aua le faafoeina o e galulue i pisinisi, ese mai le Malo ina ia faataatia i lagatonu le faatinoina o galuega, e le gata o i latou e ou galuega, aemaise i latou o lo o galulue ina ia malamalama i a latou aiatatau, malamalama i le faatinoina o galuega, aemaise foi i latou e ou galuega ina ia faia ma le tonu ma le alofa e tusa ai o le Tulafono le faatinoga o galuega. Aua o i latou foi nei o lo o tele lo latou sao i le atiaeina o Samoa i so o se itu.

Ua tele nisi o finagalo faaalua i le tatou Tulafono lenei, ae i ai nai vaega ia e toe fia faamamafa lau Afioga i mea ia o pemitā. O le mea masani, o le fia talanoa i le va lea o le pemitā faigaluega ma le visa, le visa nofomau, ona o le tele o taimi e muamua ave le visa ae le i mautu le pemitā faigaluega. Ona i ai lea o le taimi ua feteenai ai vaega ia e lua. Pe leai se vaega ina ia faigofie ona faafealofani mea ia e lua. Aua i lou talitonuga, e tatau ona muamua ave le visa ina ia iloa e mafai ona nofo i Samoa ona faatoa ave lea i ai o le pemitā. I lou lea talitonuga pe afai e tusa ai ma le tatou Tulafono.

Ona ou oo mai lea i mea tau livi. Faafetai, o lenei foi e i ai le avanoa e carry forward ai leave. Aua e pei o le mea lea sa i ai, o la e pei e faatapulaa mai ae faafetai e i ai le avanoa lenei e mafai ai ona fetuunai livi fuafua, aua e i ai taimi e le avea ai livi o nisi ma aso mai, a o lenei e i ai le avanoa e fetuunai ai. A o le mea lea e fia fesili ai lau Afioga i le Minisita, o lenei e le o i ai se vaega patino i le mea lea e tau o le bereavement leave, i le taimi e maliliu ai pei o le mea masani lea e i totonu o tagata faigaluega a le Malo. E tatau ona tagai i ai lau Afioga, e tatau foi ona i ai se tulaga faapea.

A o le mea lea e fia talanoa i ai, o le mea lea o le paternal leave, le livi foi lea e ave i tamaloloa. Faafetai o lea ua i ai le faatagaga lea mo le lima aso. A o le mea lea e fia ave i ai se manatu, o le vaega lea e aumai i i le spouse, wife, legal wife, or spouse. Ia, se i toe tagai ane i ai lau Afioga i lea mea, pe le o encourage e tatou le mea lea o le ese o le toalua faaipoipo ese le toalua foi lea. Aua o lea e fai mai, e mafai ona ave ou livi pe afai o lou toalua faaipoipo, ia po o lau spouse, a. Ou te le iloa leaga e le o i le faa-Samoa na

o le faapapalagi lea e i i. O lona uiga o se teine foi lea ua leva ona lua nonofo pe 9 masina pe a, ua i ai sau, ia, e entitle foi ia i le mea lea pe a avatu se faamaoniaga. Ae i ai lou talitonuga, ia, aua o tatou lea ua alu i mea faa-Kerisiano, e le faapea o se fia mama o se isi, leai, e tatau ona atagia i i...

Susuga Hon Tuilaepa Fatialofa Auelua Sailele Malielegaoi (Taitai o le Itu Agai): Lau Afioga i le Fofoga Fetalai o le...

FOFOGA FETALAI: Ia, se i fai mai sau malologa se i tuu atu i le Taitai o le Itu Agai po o le a lana faauilavea.

Susuga Hon Tuilaepa Fatialofa Auelua Sailele Malielegaoi: O le mataupu lea sa ou talanoa i ai, e aoga foi lou tulai atu, e le faapea e mamafa itutasi mea e ono tutulai ai sui usufono, tusa lava po o sui usufono o le latou Vaega. O se mea ou te fia malamalama ai, e mafai lava ona e faamalamalama mai le uiga o lou taofi? Oi e fanau le fafine ae livi ai fua ma le tamaloga? Ae lelei ona faamalamalama mai lou taofi?

FOFOGA FETALAI: Ia, tulai mai le sui usufono mamalu, faaauau lau saunoaga.

Tofa LEALAILEPULE RIMONI AIAFI: Faafetai lava i le faauilavea. Ia, atonu e pei o le tulaga lea e i ai, faafetai i le tatou Tulafono o lea ua faataga lea mea, aua o le mea e tatau ona fai. Ae pei o le mea lea na talanoa atu ai, ona o lea e i ai le faatagaga i le Tulafono, e le gata o le toalua faaipoipo, a o le toalua faapouliuli.

E pei o le mea lena o lea e talanoa atu ai, ae se i toe tagai pea i ai le Afioga i le Minisita, pe taga lea mea, mo le agai i luma o tatou Tulafono.

Ona oo mai lea i le...

FOFOGA FETALAI: Ia se i tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: E le o malamalama le... O lona uiga e tatau ona nofo le tamaloga e alu e livi e tata napekini?

FOFOGA FETALAI: Ia, leaga o lea o le a lua fetauai ae o la e nofo mai le Minisita e ana le Tulafono po o le a le sao. Ae ou te talitonu, e tali lava le Minisita, e tali uma a mea ia ua lua talanoa ai.

Ae tulai mai e faaauau le saunoaga.

Tofa LEALAILEPULE RIMONI AIAFI: Faafetai i lau Afioga. Ae manatua foi e lau Afioga i le Fofoga Fetalai, o le Afioga i le Taitai o le Itu

Agai e toavalu si ana fanau. O lona uiga, o la e malamalama lelei lava i le mea lea e tupu. Ae faafetai mo lea avanoa, talosia ia pe tau ane ai se finagalo o le Afioga i le Minisita.

Ona oo mai lea... se i tuu atu la lau faamatalaga...

FOFOGA FETALAI: Ia se i tuu atu la le avanoa i le Minisita leaga o lea ua felavasai a lua faauilavea, ae lelei le tuu atu i le Minisita se i... Lau Afioga i le Minisita, saunoa mai.

Tofa Hon Leatinuu Wayne Soialo (Minisita mo Pisinisi, Alamanuia ma Leipa): Faafetai atu lava i le sui usufono mo le mataupu taua, ese ma le taua. O le tulaga lava lena o lea ua ala ai ona toe Iloilo le Tulafono, ona ua leva ona nonofo ma latou ae leai se mea na faia i ai. O la e sa latou silafia ma latou iloa o aafiaga ia o le Tulafono sa i ai. Ae taatia maia, o lea o le a taumafai e iloilo ona avatu ai lea o se faaiuga lelei i se tulaga e tataua ona taatia ai pe faaoga taitoalua faaipoipo pe faaoga atu ai ma isi taitoalua ia ua outou silafia. Ae sa i ai se manatu ailoga e i ai se isi i totonu o lenei Maota e i ai se tulaga faapena. Ia ae na o amio faapena ae leai ni tulaga faapena. Ia ma le faaloalo lava.

FOFOGA FETALAI: Ia, o lea ua saunoa manino le Afioga i le Minisita.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, e...

FOFOGA FETALAI: E te faauilavea i le Minisita pe te faauilavea i o?

Susuga Hon Tuilaepa Fatialofa Auelua Sailele Malielegaoi: Leai o lea ou te...

FOFOGA FETALAI: Ia saunoa ia lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: Sa ou fia maua se faamalamalama o le afuaga, po o i ai ni faamaumauga taualoa, leaga e i ai lava mea na ou faalogo i ai a o... mo mea faalogo. E faapea; e oo loa i le taimi e faatiga ai se tina, ona... gasegase foi lea o le tama ia.

Tofa Hon Leatinuu Wayne Soialo: Lau Afioga i le Fofoga Fetalai, o lea o le a tuu le tatou...

FOFOGA FETALAI: Ia, se i onosai mai le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: A o le mea la lea sa ou fia maua, o se faamalamalama mai le afuaga pe sao faamaumauga ia.

Tofa Hon Leatinuu Wayne Soialo: Lau Afioga i le Fofoga Fetalai...

FOFOGA FETALAI: Ia, e avatu pea le fesoasoani a le Nofoa ona o lea o le a taumafai e saili le pogai o le mafauauga o le sui usufono mamalu mai Faleata 3 ae o le a taatia le tatou Tulafono e tatau ona tatou talanoa i ai i mea taua. Ia o lea ua lagalaga mai ai ma isi tulaga ia, e faaeteete foi le Nofoa tatou te oooo i tulaga ia, aua e i ai lava tatou suaga faalautele. Ae a tatou talanoaina loa i totonu o le Maota, e i ai tatou faamoemoe ina ia tatou talanoa i mea mamalu ma mea e ao ona faatino i tatou Tulafono.

O le mea lea...

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, e le o ni suaga mea ia ou te tulai atu ai, ae sa ou fia tuliloa le tulaga, o lea e tutulai mai ae i ai lona taimi e fesili ai i mataupu ia.

Tofa Hon Leatinuu Wayne Soialo: Lau Afioga i le Fofoga Fetalai, e fia fesoasoani atu i le mataupu lau Afioga...

Susuga Hon Tuilaepa Fatialofa Auelua Sailele Malielegaoi: A o le finagalo o... lea ou te agai tonu lava i le sui usufono o lo o saunoa nei.

FOFOGA FETALAI: Ia se i onosai laitiiti mai lava se i tuu atu le avanoa lea po o le a le...

Se i saunoa mai lau Afioga i le Minisita.

Tofa Hon Leatinuu Wayne Soialo: Lau Afioga i le Fofoga Fetalai, o lo o talanoaina le tatou Tulafono o lea e taatia i le Maota, tatou te le i omai i i e sue ni tala. O lea o le a tatou suetala ma tatou faitala, ae taatia ai le Tulafono lea...

Susuga Hon Tuilaepa Fatialofa Auelua Sailele Malielegaoi: O le mea e fia faamalamalama lau Afioga, e le o ni suetala mea ia...

Tofa Hon Leatinuu Wayne Soialo: O le isi foi mea lau Afioga...

FOFOGA FETALAI: Lau Afioga i le Taitai o le Itu Agai...

Susuga Hon Tuilaepa Fatialofa Auelua Sailele Malielegaoi: O lea ou te fesili i le faamalamalamaga a le sui usufono o lo o tulai mai nei, ae tapuai... fesili i au Ofisa e aumai se fautuaga ia oe.

FOFOGA FETALAI: Ia silasila mai i le Nofoa.

Tofa Hon Leatinuu Wayne Sooialo: Lau Afioga i le Fofoga Fetalai, e le aumaia i inei ni tala faalogo i totonu o le tatou Maota e fai ai le Tulafono lea. O le toe taumafai atu lea.

FOFOGA FETALAI: Faafetai o lea ua maua. O le fautuaga, ia, o le a tele lava a tatou tala i o ma o ae o le a taatia ai le tatou mataupu taua. O le mea lea, ua ou faagataina ia felafolafoaiga faapea i lenei taimi. Ua ou manatu se i sefe le taimi taua mo tatou galuega. O le mea lea, o la e talanoa lava le sui usufono mamalu ia i ona ia lagona, ae le mafai foi ona tatou soona fesiligia i nisi tulaga. Aua foi leaga e le o se Tulafono a le sui usufono mamalu o le Tulafono a le Minisita? O le mea lena e faamalie atu ai i lau Afioga i le Taitai o le Itu Agai, o le ala lena o lea ou te piipiama atu ai.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai...

FOFOGA FETALAI: Onosai mai i lalo se i uma atu lau tala lau Afioga i le Taitai o le Itu Agai. Onosai mai, onosai mai se i fai atu lau tala.

Susuga Hon Tuilaepa Fatialofa Auelua Sailele Malielegaoi: O lea ou te fesili i se faamalamalamaga.

FOFOGA FETALAI: Alaala mai i lalo, alaala mai i lalo.

Susuga Hon Tuilaepa Fatialofa Auelua Sailele Malielegaoi: O lea ou te fesili leaga o lea e aumai i tatou Tulafono Tumau.

FOFOGA FETALAI: Alaala mai i lalo. O lea e fai atu le tala...

Susuga Hon Tuilaepa Fatialofa Auelua Sailele Malielegaoi: A o le faalavelave ua faalavelave mai o, a o lea ou te fesili atu i o.

FOFOGA FETALAI: Ia alaala mai lalo. O le a tuu atu le avanoa i le sui usufono mo Faleata 3 e faaauau lau saunoaga ina ia faaauau le tatou galuega.

Tofa LEALAILEPULE RIMONI AIAFI: Faafetai atu i lau Afioga i le Fofoga Fetalai. E faamalulu atu o lou lava manatu e tusa o le Tulafono, ae

faafetai. A aoga lelei. Ae na pau le mea lea e saunoa i ai le Minisita, o le upu lea faapea ua leva ona i i ae leai ni mea e faia i ai, ia o le mea lena a oe e fai, a. O au foi, talu ona ou i inei i le Palemene lenei, o Tulafono uma lava e aumai pe aumai e le Malo pe aumai e ai, ou te lauga ai lava, pe ou te i ai lava i le Malo i le tausaga na tea nei, ou te lauga ai lava ma fa ii ai ou manatu pe a aumai e le tusa ma lou talitonuga. Ia, a o mea na, e leai, se aua tatou te ola tautuuai, o lena ua ia te oe le avanoa, ia a avatu fautuaga a talia lelei, a leai, ia e le afaina.

Ona ou oo mai lea lau Afioga i le Fofoga Fetalai i le vaega lea na taua o le faafaigaluegaina o tamaiti 13 tausaga agai i lalo. O le mea lea ona e fou i le Tulafono le vaega lea. O le mea lea e fia fai i ai se manatu lau Afioga, a e vaai i ai i le vaega tonu lea o le Tulafono, e 3 tausaga na e aumai i ina. A o mea e sili ona confusing ma le maua ai se tonu mautu, e amata lava le vaega o le Tulafono faapea; e le tatau i se tagata ona faafaigaluegaina se tamaitiiti e i lalo ifo o le 16 tausaga. O le amataga lena o le vaega lea, e faasa ai ma tapu ai ona faafaigaluega se tamaitiiti i lalo ifo o le 16 tausaga. Ae a oo mai i le vaega lona lua o le Tulafono ua faapea mai, e mafai e se tagata ona faafaigaluega se tamaitiiti e le itiiti ifo o le 13 tausaga. O lona uiga, ua matua feteenai ai lava i ina le Tulafono. E tatau ona tagatagai i ai lau Afioga i le Minisita ma le matagaluega, ona toe oo lava lea i lalo ae, ua toe sui mai foi, ua faapea mai, e le tatau i se tagata ona faatinoina pe faafaigaluegaina se tamaitiiti i lalo ifo o le 18 tausaga le matua i galuega foi lea faigata, pe mamafa, i le vaega lava lea e tasi o le Tulafono. E tasi le vaega ae tolu tausaga lena e aumai ai i ina. Ia, o se vaega e tatau ona toe iloilo lelei, afai lava o le finagalo lea o le Malo e 16 tausaga, taofi mau ai lava i ina, ne i te i ua feteenai ma le agaga foi o le tatou Malo ma tatou uma e uunai tamaiti e faamuamua le aoga, faamuamua le aoga.

Ae afai foi ae i ai se agaga faapea, o lea lava e masani i le taimi a o tatou aoga, e i ai le mea e igoa o le part time, faaigoa pea o le part time, aua le tuua i ai le mea o le faigaluega, vagana ua i ai le faatagaga e faigaluega. Lona uiga ua mafai ona full time. Ae a tuu i ai le upu lea o le galuega faavaitaimi, taimi e le o i ai ni aoga, ia pei e manaia le vaega lena aua e maua ai foi tupe a nai tamaiti ma aoaoina ai foi mafaufau i le mea o galuega ma tulaga faapena e tapena ai i le taimi o le a omai ai i tua e faigaluega.

Ona oo mai lea lau Afioga i le Fofoga Fetalai i galuega ia faavaitaimi, faafetai o lea ua aumai i totonu, e le gata o le Matagaluega o Leipa, aemaise foi o le NPF ina ia mafai ona totogi lafoga ma NPF a i latou ia e faigaluega i fafo. O se vaega taua tele. Ae o lau fautuaga muamua lava i lau Afioga i le Minisita, soia ia le toe fefoifoiai lou finagalo i lenei mataupu taua tele, e taua tele le mataupu lenei ia Samoa. O le tala mai ia Ausetalia, e le gata ina faamanuiaina i latou i le maua o tagata faigaluega i le taimi lea na faamai i le lelava o tagata faigaluega, ia a o lea foi e manuia ia tatou i tupe e lafo mai. I lou talitonuga, e le tatau ona toe talanoaina lea mataupu pe tuu pea e ave,

o lea ua tatou matuai maui lava le tulaga faamanuiaina o le atunuu i lenei mea. Aua o lea o le a sui ai e Ausetalia. Ia manatua foi mea ia pei ona saunao le Sui Taitai, o mea ia e fai i maliliega foi ia, ua leva ona taumafai le tatou atunuu mai le amataga, o mea o le direct form of aid, o le mea o le fesoasoani foi lea e tuusao lava i lima o le tagata. Aua e tele ina aumai fesoasoani mai Niu Sila ma Ausetalia ma paaga, e tele ina aumai i le aotelega foi lenei i le Malo, a o le fesoasoani lea, e tuusao lava i le lima o le aiga, tuusao lava i le lima o le aiga.

Ia, talosia ae faaauau, a o le mea la lea o le a sui e Ausetalia, o le a sui o le a le toe RSE, ae o le a tuufaatasi i le mea fou lea o le a aumai nei. O le manaia o Ausetalia, e i ai latou galuega uumi foi nei e taitolu taifa tausaga e o ai o tatou tagata. Ae faafetai o lea ua e tilotilo i ai ina ia mafai ona faatulafonoina i Tulafono faatulafonoina e le tatou Malo, aemaise foi o le taumafai lea e totogi a latou NPF e foi mai Samoa tua i ai. Ae faafetai o lea ua toe faalogologo atu ua toe faaauau lea vaega lelei.

O le isi vaega lau Afioga i le Minisita, pe le ono tataua ona tagai i ai tagata faigaluega uma lava e tataua ona i ai se latou standard po o se pepa foi lele e alu atu loa le tagata faigaluega, standard contract, se konekarate foi lele e alu atu loa le tagata faigaluega faasaini ai ma malamalama ai i ana aiatatau, o ana tiute ma ana mea e fai, e faafaigofie ai. Ia i ai lava se form lea i totonu o Matagaluega uma i totonu o falefaigaluega uma ia e faigofie ai ona faaauau galuega ma ia aua ai ne i toe i ai se feteenaiga mulimuli ane.

O le faafetai, o lea e manino lava i le Tulafono mea nei o savings provisions, mea foi nei sa tatou tau vevesi ai i isi taimi, o lea e i ai i totonu i i e faaauau ai ni vaega o le Tulafono tuai i le Tulafono fou pe a tusa ai ma talafeagai. A o le isi luitau tele lea ua feagai nei ma le Malo ma le lalolagi atoa, o le faamai, o mea fou, o se vaega fou lea vaega. A o lea na tatou maua mai le misela faasolo mai i le mea lea ua i ai nei, pe le tataua la ona tuua i totonu se vaega, se aiaiga fou i totonu o le Tulafono, aua o le mea o lea vaega, e le o se finagalo o le tagata e faia le galuega, e ona galuega, e le o se finagalo foi o le tagata faigaluega, a o le finagalo o le faamai. Ae pe o le a faapefea la ona puipui tagata faigaluega ma fesoasoani foi ia i latou e ou galuega. Aua e sao e le mafai foi ona faaauau e tagata e ou galuega le aufaigaluega pe a leai ni tupe e maua mai. Pei e tataua ona tilotilo i ai e kava i lalo o se isi schemes faa-insurance pe faaopopo i ai galuega faatino a le ACC, ae totogi se isi au .01sene pe a e kava ai mea faapea i le agai i le lumanai. E kava ai le employer, kava ai le tagata faigaluega, aemaise la e fesoasoani ai foi i nai pisinisi ia lea e tupe i aso uma, pei o le avepasi, avetaxi, aufaipasi, aufaitaxi. Ia na ou alu atu nei i o i le aso Farai lea na tea nei e gata ai le resitalaga o pasi ma taxi, ia e ta lava le 8 i le afiafi o la e i ai nai tagata, tau totogi lea vaega, ae manatua ua leva aso o malolo pasi ma taxi e le feoi. Pe le tataua ona fai i ai se fesoasoani a lau Afioga ma le tatou Malo.

Ia, lau Afioga i le Fofoga Fetalai, e i ai nisi o mataupu, ae ou te taitonu ua lava ia motugaafa pe tau ane ai se finagalo pe leai, ae ua fai se finagalo o lenei itumalo aua le tatou Tulafono. E faafetai atu ai i lau Afioga mo le avanoa. Ia manuia ou faiva, aemaise o le faafofogaaga a Samoa. Faafetai.

FOFOGA FETALAI: Malo saunoa le sui usufono mamalu. Malo foi saunoa o lea ua oo mai le faasoa ua faafogafoga atu foi ma le totoa le Afioga i le Minisita, ou te talitonu o la e ua faamaumau uma e le Minisita nisi foi o fautuaga taua. Ia, o le avanoa lenei o se tasi o sui usufono.

Ia, o lea ua ou vaai atu ua fou mai le sa o Safata 1. Tulai mai le sui usufono mamalu lau Afioga Leaana Ronnie Posini.

Afioga LEAANA RONNIE POSINI (Safata 1): E faatalofa atu i lau Afioga i le Fofoga Fetalai, e faatalofa atu foi i le Afioga i le Palemia, le Sui Palemia, o le Kapeneta ma Afioga i Minisita Lagolago.

E faatalofa foi i lenei Itu i le Taitai ma le Sui Taitai. E faatalofa atu foi i le tapuaiga a Samoa i Le Ao Mamalu o le Malo ma le Sui o le Fono a Sui Tofia, aemaise o le aufaitatalo o lo o taufai tatalo aua le tatou Palemene nei.

Lau Afioga i le Fofoga Fetalai, ia, e tau fai foi se manatu o lenei itumalo i le Tulafono ua taatia i le tatou Palemene nei. Ae au foi le manatu i le taimi ua sola i le saunoaga a lau Afioga i le Fofoga Fetalai i sui usufono mamalu o lenei Palemene ua tuua le Malo i le Afioga i le Minisita Lagolago. Ia, o le Minisita Lagolago foi ua leva foi ona matou mafuta ma matou nonofo faatasi ma matou aoga. Ia, e faamaise atu ai i le aiga faanoanoa aemaise foi le itumalo, aemaise foi le Afioga ia Tupuola Patu Tiavaasue Siaosi. Ia maua foi le mafanafana o le aiga aemaise le itumalo. Ua maua foi le avanoa lelei o lenei usufono e faamafanafana ai i lo tatou atunuu i e ua maliliu i lenei faamai aua o le mea moni lava lau Afioga, o le faamai oti ua lofia ai lo tatou atunuu. E avatu ai faamafanafanaga i lo tatou atunuu i e ua maliliu, o e ua mafai ona faitauina i totonu i faamaumauga a le Soifua Maloloina, ma nisi o le toatele o le tatou atunuu ua maliliu i lenei faamai, e le o maua i faamaumauga a le tatou Malo. E moni ai le finagalo o lo tatou atunuu, e toe maua lava le tamaoiga, e toe maua foi tupe, a o le soifua ua maumau, e le toe maua. O a foi ni tatou faafiafiaga e faafiafia, pe fia lava le fia sefulu tausaga e faafiafia ai, e le mafai lava ona toe galo mafatiaga o lo tatou atunuu. O lea e faamaise atu ai i lo tatou atunuu, o e ua tetea i le mafutaga a le maliu ma le oti, o e pele i o tatou aiga. Lau Afioga i le Fofoga Fetalai, o sa matou faamaise atu lea i e ua maliliu ona o lenei mala ua oo mai i totonu o lo tatou atunuu.

Lau Afioga i le Fofoga Fetalai, ia, e tau fai atu foi se manatu o lenei itumalo, e tusa ai ma lenei Tulafono, faafetai tele i lau Afioga i le Minisita ma lenei Tulafono. O a foi ni o matou manatu e tuu atu i lau Afioga e ala atu i le Fofoga Fetalai, pe aoga pe le aoga, ae o le matou tulai atu, o le matou

tuualalo e faufautua atu i lau Afioga i le Minisita, aua le manuia lautele o lo tatou atunuu. E pei o lea ua uma ona taua e isi sui usufono o lenei Palemene isi mea, ae ou te toe fia oo lava i galuega faavaitaimi, leaga e ese le taua i le faitau a lenei itumalo ma lenei usugafono.

O lau matau lava ia o le manuia lenei sa lilo i lo tatou atunuu, o le mea moni lava lea, leaga o la e faalogologo mai nai aiga o le tatou atunuu, o lea e i ai a latou alo ma fanau ua o i galuega faavaitaimi lenei. O le tatou atunuu lau Afioga i le Fofoga Fetalai, na soifua mai lava na soifua mai i faatoaga, na soifua mai i le gataifale, ae le i tamaoaiga atoa le tatou atunuu i faatoaga. O nisi foi aiga, e pau lava le mea e agai i ai, ia lava le tausiga o meataumafa, e tausi ai le soifua ma le tamaoaiga o aiga taitoatasi. A o mea ia ua taumafai i ai lo tatou Malo, o galuega nei ua ou vaai i ai, ua ou vaai i le manuia o tatou aiga nei.

A ou vaai atu i ai, ua lelei ai ma aoga, ua gafatia e nai aiga nei. Aua o polokalame ia, na ave lava e faatatau i e, e le maua ni galuega, ae ua ou vaai ua gafatia e aiga nei le tologiina o pili aoga, e oo lava i le Iunivesite, ua tulai mai foi ia alo ma fanau, aua o le naunautaiga lenei o le tatou Malo, ia ola aaoaina a tatou fanau. E le gata i lea, ua ou vaai foi i nisi aiga ua agai mai, ua ou vaai atu, ia vaeatu lava le paia o lenei Palemene, ua faatau le manupapalagi e tasi, faatau le lua, faatau le tolu. Ua omai ua totogi tagata e fai faatoaga o maumaga, o tupe nei o lea e maua mai, a o lau vaai atu lea i ai sole ua tino mai. Ua tino mai tulaga o faatoaga ua galulue.

E ta te tau matau o isi aiga e le i maua se tamaoaiga i faatoaga ma tulaga faapena, a o galuega nei, se ua tulai mai ai le faateteleina o tatou faatoaga. E le tau faia sau tala o lenei e silasila le Maota, ua tatou vaai i ai ua fau ia maota ma laoa, tulaga lelei, o isi aiga ua oo i le taitolu taavale, aemaise o tatou nei i tua. Aua e pei e tau e tatou i tua, o mea ia o taavale e pei o taulealea matua lea o le aiga, e agai i faatoaga e agai mai pe a tutupu ni faalavelave, aemaise nei vai tau o le faamai, o taavale o le taulealea matua lea o le aiga. O le ala lea e sili ai ona ou faatau le galuega faavaitaimi.

A o lea na maua i lau Afioga i le Minisita ma le Malo ua taofi galuega ia, a o lea ua ou toe tau faalogologo atu ua toe tatala foi. Aua ne i o tatou misia manuia ia. Aua ou te fai atu lava lau Afioga i le Minisita ma lenei Palemene, pe tatou te tufa tai miliona lava i le nuu, e le tutusa ma faamanuiaga nei. E le taitai ona tutusa ma faamanuiaga nei, aua o lea ou te tau matau atu i totogi, a liliu i le tupe Samoa tagata nei ua faamaoni, o se mea o le va o le \$2,000 i le \$3,000 i le vaiaso le tupe Samoa e maua ai. O lona uiga, ou te le iloa pe na o le totogi o le Afioga i le Palemia e talafeagai ma totogi nei, e le gafatia e lo tatou Malo. A o le tamaoaiga lea o lea ua tatou vaai atu i ai, leaga o le mea lea sa naunau i ai lo tatou Malo, e suesue uma auala e manuia ai le atunuu. O le ala lea o le taua ia te au.

O le isi foi mea e sili ona ou matau ai i le mea lea lau Afioga i le Fofoga Fetalai, se ua faamamaavega i o tatou aiga i fafo. Ua fai mai ua mama ua le toe tau lafoa mai ni tupe i o tatou aiga i inei. O nai o tatou aiga foi i fafo....

Afioga Masinalupe Makesi Masinalupe (Lefaga ma Faleaseela): Lau Afioga i le Fofoga Fetalai...

FOFOGA FETALAI: Ia malie le sui usufono mamalu se i tulai mai le sui usufono mo Lefaga ma Faleaseela e faauilavea.

Afioga Masinalupe Makesi Masinalupe: E le faalavelaveina le saunoaga matagofie a le sui usufono o Safata 1. E pau lava o lea, o lea e tau maua atu, o lea e manino, ona e i ai foi nai tagata o le matou itumalo o lea e manuia i lea vaega. A o le faamaninoga, e le faapea ua taofia ona o se tulaga e taofi e le toe faaogaina. E taofi se i toe soalaupule ona e i ai tulaga o lo o tutupu mai fafo, o lea e manatu ai le Minisita, e le mafai ona faaauauina se i sologa lelei le vaega lea. E leai se mea e tiga ona iloa o la e faaletonu mai nisi o tatou tagata faigaluega, ae faaauau lava. A o le tulaga ia e pei ona i ai, o lea lava e i ai le talitonuga o le Malo e faaauau pea i se taimi pe a sologa lelei ma foia le faafitauli.

FOFOGA FETALAI: Ia faafetai, malo foi i le fesoasoani mai a le Afioga i le Minisita Lagolago. Oi saunoa mai lau Afioga i le Minisita.

Tofa Hon Leatinuu Wayne Soialo: E faafetai lava i lau Afioga mo le avanoa, ua le fia faalavelave lava i le saunoaga a le sui usufono, masalo e tele se faamalamalamaga e tatau ona tuuina atu, ina ia ao ona malamalama ai le sui usufono, ona na o itu lelei la e saunoa mai ai. Ae ou te talitonu, e le i oo i ai le tina lea e toaono le fanau lea ua tiai i inei i Samoa, ae nofo le toalua i Niu Sila ma Ausetalia. E masalo o isi itu ia, ae ou te le o fia faamalamalamaina i le taimi lenei, ona se i i ai se avanoa ona tuu mai lea e faamalamalama atu ai. O le isi foi tulaga, e i ai foi isi tulaga e ala ai ona taofi, ina ia se i fai le iloiloga, ona o le toatele o i latou ua autovaa mai, e i ai hotels, e i ai Chamber of Commerce, e i ai leoleo, e i ai tatou nurses, e i ai tatou faiaoga, ua aafia uma i le tulaga lea. E le mafai la ona nofonofa le faigamalo lenei, ae aliae ifo i luga faafitauli nei. O lea la ua mafai ai ona tilotilo i ai le faigamalo, e fai aiaiga ma toe review le program lenei, ae le o taofia mo le silafia. O lea sa tatalo mai le Komesina o Ausetalia, slow down, ia, talia le slow down.

A o le mea la e tatau ona fai, e tatau ona tatou tilotilo. O le polokalame lenei, sa fai e faapitoa mo i latou e leai ni galuega, unemployed, a o le faalavelave, o lea ua alu faasoloatoa, ua ova ma le 8,000 o tatou tagata ua i Ausetalia ma Niu Sila. E le mafai ona nofonofa le faigamalo lenei ae aliae

mai faafitauli ia i aiga ma fanau ma tulaga faapea. O la e manaia le saunoaga a le sui usufono. E leai ou te le o fai atu e leaga le tulaga lea, ae se i tilotilo i ai, po o le a le tulaga e tataua ona faatino, ona amata lelei ai lea. O lea la ua uma ona talia le faigamalaga o Me, e tasi le faigamalaga mo Niu Sila, tasi le faigamalaga mo Ausetalai, toe tilotilo i ai ma toe iloilo lelei e le Matagaluega, po o fea lea e mama atu ai a tatou tagata faigaluega o lo o faigaluega iinei lea ua ala ai ona mafua le tulaga lea. Ou te talitonu o lea ua avatu se faamalamalama, ae leaga e tele isi aafiaga i tua e le o malamalama i ai le tulaga i le sui usufono. Ae mafai ona faamalamalama atu i se taimi i se tulaga e toe faaopopo atu i ai. Ae pei o le taumafai atu lea, ae faafetai atu foi i le Afioga i le Minisita Lagolago o le Ofisa o Tiute, mo le fesoasoani mai i le mataupu. Ia faafetai lava.

FOFOGA FETALAI: Ia malo faafetai, ou te talitonu o lea ua malamalama le tulaga lea, o lea foi ua faafofoga mai lau Afioga i le sui usufono mamalu, leaga o lea sa e taua le taofi, e pei o lea ua tulai mai le Afioga i le Minisita ina ia faamanino lelei lenei mataupu, o lo o faafogafoga le atunuu. Ae masalo o le a atoatoa lava lau faafofogaaga pe a faapea e maea le saunoaga ona tuu atu lea i le Minisita e faalautele ai lona finagalo e pei ona saunoa.

Ia se i tulai mai le sui usufono mo Vaimauga 1.

Afioga Sulamanaia Fetaiai Tauilili Tuivasa (Vaimauga 1): Lau Afioga i le Fofoga Fetalai, e le fia faalavelave lava lenei itumalo pe a lauga foi ma faaali finagalo o sui usufono o le Palemene.

Ae o le faafesili i le Afioga i le Minisita, o lea e malamalama le sui usufono lenei, o le faiga faavae o le tatou Maota, e tali mai le Minisita, ae pei o lea e...O lea e fia malamalama lou sui usufono lau Afioga i le Fofoga Fetalai, po o le latou faiga faavae lea e tali mai e isi Minisita Lagolago ia finagalo. Aua o le Paeaiga sa tuanai, e toeafe lava gagana nai Minisita Lagolago. O lea la ou te fia fesili ai pe o le faiga faavae a ai, e mafai lava ona saunoa mai le Minisita Lagolago o isi Matagaluega. E pei o le agaga lena o lea e fia malamalama ai lou sui usufono.

FOFOGA FETALAI: O lea ua maua atu lou finagalo. Atonu e i ai se taimi saunoa le Malo e faamalamalama le tulaga lea ua e lagaia mai. Ae ua ou manatu leaga o lea e faaauau le sui usufono o le itumalo o Safata. Ia tulai mai lau Afioga Leaana.

Afioga LEAANA RONNIE POSINI: Faafetai tele i lau Afioga i le Fofoga Fetalai, faafetai foi i le faauilavea a le Afioga i le Minisita Lagolago. Malo lava faafetai e pei o lea ua e talia ato si au mataupu. Ae pei ua tulai

mai le Minisita, o lea ua ou talia uma a oulua faamalamalama lea ua aumai, ae faafetai tele.

Ona faaauau lea o se tala i galuega faavaitaimi e pei o se faamamaavega lea i o tatou aiga i fafo. Ae manatua foi lau Afioga i le Fofoga Fetalai, o tatou aiga la e i fafo, e tutusa lelei lava o latou faalavelave la e fai i fafo ma fai i Samoa nei. O lo o fai a latou tautua i Ekalesia, o faalavelave faale-aiga, o maliu, o faaipoipoga, ae toe faaopoopo atu ma tatou, o se avega mamafatu lava. A o le latou faafetai lea, faafetai i galuega lelei a le Malo na fai, o lea ua fua mai. Ae le gata foi i lea, o le tulaga o le tatou foreign reserve, o lea ua leaga lenei vaitau o le lalolagi, ae meamanu galue ai.

E faafetai foi i lau Afioga i le Minisita ma lau faamalamalama i nisi mea fai mai ou te le o iloa, le tulaga o le tina e toaono le fanau ae amiovalea mai le tama i o, ia silasila totoa i ai. Ae afai i te i ua afaina ai le toa 8,000 lea, e le faasinotonu lava i ai e foia ai le faafitauli. Ae pei a aafia ai le 8,000 o tatou tagata ia, ona i ai lea o le popolega. O le ala lea o si a matou tuualalo atu i lau afioga, ae faafetai tele mo le faamalamalamaina o le mataupu lea.

Lau Afioga i le Fofoga Fetalai, ona oo mai lea o se manatu o lenei itumalo aua ou te tau matau atu i lenei Palemene, o le toatele o sui usufono o lenei Palemene o tagata e fai a latou pisinisi, e fai a latou tagata faigaluega. Ae ua manaia lava i lau vaavaai atu le mea lea, mea ia o faiaiga faasoosa, faiaiga faamalosi, o faiaiga mataga, e aoga foi i totonu o lenei Palemene, aua o le toatele o i tatou e fai a tatou pisinisi. E le gata foi i totonu o e ana galuega, ae oo foi i totonu o le Malo ma mea e tutupu mai, aemaise lava i tatou o lea e i ai le power, ona faasese ai loa lea o le faiga o mea faapea, ona fai sese ai lava lea o faaiuga i totonu o galuega ona o tulaga ia, i tulaga e tulai mai. Ae faafetai o lea ua ou vaai atu i le faiaiga faasoosa, faiaiga faamalosi, o tulaga faapena. Faafetai ua afea e le Tulafono ma matua faamamalu i ai. A o i ai foi nisi o le tatou Palemene o solia ia Tulafono, se molia uma, ave uma i le Tulafono. Aua o le fuaitau lea lau Afioga i le Fofoga Fetalai, o a mea tatou te taumafai e teuteu, ae na o le tatou o atu lava... O le mea o le vao leaga e ola i totonu o se eleele, fai mai a moa atu lava ma sasa e toe ola foi, ae a se i atoa i luga ma le aa e le toe tupu ia mea. O le mea lea e taua ia i tatou, aua e i ai le faitau isi taimi, o Tulafono e noatia ai le tagata, ae pei e fai i isi taimi e fai e tatou Tulafono ae le noatia ai tatou i le Tulafono. E leai o le Tulafono e leai lava se isi e i luga atu o le Tulafono. O le agaga lea o le faafetai tele.

O le tulaga i mea ia o... faamanino mea ia o konekarate, e ese le taua i lau faitau i konekarate i galuega e a ia galuega ma faatino mea ia konekarate. O le konekarate faapea e lima tausaga, a uma o la e i ai i totonu o aiaiga, ia manino aiaiga o le faiga o konekarate. E le gata i lea, a oo foi ina i ai foi ma faaupuga faapea e mafai ona toe faaopoopo lau konekarate, o le a toe faaopoopo atu i le isi tausaga. A ia manino uma mea ia i lau faitau, a oo la ina tuli le tagata faigaluega, ia manino i totonu o le Tulafono, ia i ai se tali a le tagata faigaluega. Aua o mea ia ou te vaai atu e tutupu foi i e ana le

galuega, na ona ita lava toatamai, ia ua uma lau konekarate o lea sa toe faaopoopo mai aso o lau konekarate, e leai se tali. E alu atu lava le faatonuga, e uma lava i le aso Faraile aua ne i e toe sau i le aso Gafua. Ae faafetai o lea ua aumai konekarate, ia maioio ma malamalama lelei, aua ne i faaaogaina foi e tatou lea e ana galuega ma pulea galuega le power sese lea, a ia tuu le aia i tagata faigaluega, aumai le latou faamaninoga, ma faamanino mai le mea na ala ai ona tuli, aveese mai totonu o galuega ma tulaga faapena. O le faafetai ia manino tulaga ia, a manino lava e malamalama e e pulea galuega ma tagata faigaluega, ona alu malie lava lea o le loto. Ae o le mea lea o le faamuta faafuasei, ia, lau Afioga i le Fofoga Fetalai, tailo i ai, a o lata matau, e le amiotonu lea mea, o le mea e tatau ona faamanino lelei.

O lona uiga ua aveese le aiatatau, ae o le mea lea o lea e faamamafa mai e Malo Aafaatasi, ia matua manino le mea lea o le aiatatau a tagata, aemaise lava mea nei o galuega. O le tulaga o le faiga o konekarate, ou te lagona e toatele foi tagata faigaluega o le tatou atunuu e a ia galuega sa faigaluega, e o lava ma le faanoanoa, e o lava latou ma le faanoanoa, e avatu lava le tala e malolo, malolo loa, ae leai se tali mai. A o tatou o le Palemene, o tatou o faia Tulafono, ia paleni uma mea uma. Ia paleni le tagata faigaluega, paleni latou e a ia galuega. E oo foi i totonu o le Malo faapaleni uma mea uma, ia tutusa aiatatau manino lelei ona leai lava lea o se isi e muimui leai se isi e tomumu. O le tuualalo atu lea i tulaga o galuega ia faakonekarate.

Lau Afioga o le isi mea e fia oo i ai se tala e pei ona taua foi e isi sui usufono, o le mea lea o le faafaigaluega. O lea ua ou faitau foi, e feteenai ia o le Tulafono, a uma le 16 a o lea ua sau i le 13 ia oso i le 18. Ae na ou tau matau le faamalamalama o le tatou Pre-sitting lea na fai i le 13 tausaga, e faapea mai o galuega mama. E pei o se faataitaiga o le tama ma le tina e i ai le la tama, ia fesoasoani alu atu e teuteu nai oloa. O lau faitau i mea na, se o galuega masani na. O le mea ou te popole ai i le Tulafono, se ua oo lava i le taimi o galuega masani a tatou fanau e aoaoina i totonu o aiga, e alu e fai le saka, faatino galuega masani, moa le vao. Ne i te i ua faitau faapea e tamaiti, ae se o lea ou te faigaluega, o mea na e le taua o ni tagata faigaluega o galuega mama. Se o tiute na e aoao, o le tausaga lena e 13, se o la e aoao e matua a latou fanau. Ae pei a tatou faia loa le faaupuga lena, o lona uiga ua i le mafaufau o le tamaitiiti, e oo lava la i le moaga o le vao ma fai le saka, o mea na e tatau ona... o au lea ua ou faigaluega fesoasoani. Ia tilotilo i ai, aua o le 13 tausaga, ou te talitonu lava lau Afioga i le Fofoga Fetalai, o la e aoao le tamaitiiti i le taimi lena e ona matua i so o se feau, e faatino ai feau ma galuega e tatau ona fai e le tamaitiiti, e matua ae, ua matua atamai lava le tamaitiiti. Ina ne i te i ua sese le tatou Tulafono, faauigasese foi e alo ma fanau, e leai o lena ua e faigaluega ua tatau foi ona totogi oe.

O le mea lena ia tilotilo totoa i ai lau Afioga i le Minisita, ne i te i ua tatou faatulafono a tatou fanau itu, a o le taimi lea o lea e aoao ai e matua fanau, ia atamamai ma popoto i so o se mea.

FOFOGA FETALAI: Ua maea le taimi o le sui usufono.

Afioga LEANA RONNIE POSINI: Lau Afioga i le Fofoga Fetalai, e i ai lava na i isi mea e tau fai atu ai se manatu, ae ou te usitai tele i lau Afioga i le Fofoga Fetalai i le tulaga lea ua maea lou taimi. E oo lava i pemitia pei ona taua foi e nisi ma le visa, ia silasila totoa ifo i ai lau Afioga i le Minisita.

Ona manatu lea, ia manuia tele lau Afioga i le Fofoga Fetalai, manuia le Fono a Samoa, faafetai.

FOFOGA FETALAI: Ua faamalo saunoa, faafetai o lea foi ua manino le faasoa mai a le sui usufono mamalu. O lea foi ua faafogafoga ma le totoa le Afioga i le Minisita, atonu o se taimi ona tali mai foi lea i le tulaga o le uiga o le tatou Tulafono.

Na pau lava se fautuaga a le Nofoa, o le tatou Tulafono lea e talanoa, o le Sootaga Va Lelei o Leipa ma Galuega. Ne i te i ua toso mamao i tagata faigaluega a le Malo, a o le mea lea ou te vaavaai atu ai i i, o le Sootaga Va Lelei o Leipa ma Galuega, pe sao lau tala lau Afioga i le Minisita, ina ia faafaigofie foi i le faafogafoga mai a le atunuu. Ia, o le avanoa lenei o se tasi o...

Ia tulai mai le sui usufono mai Faasaleleaga 5.

Afioga PESETA VAIFOU TEVAGAENA (Faasaleleaga 5): E momoli atu le faamalo ma le faafetai i lau Afioga i le Fofoga Fetalai. Avea foi lenei avanoa e faafeiloai atu ai lou nei sui usufono i lau Afioga i le Tamaitai Palemia faapea foi le Afioga i le Sui Palemia ma le mamalu o le Kapeneta. E faapea foi i le aotelega o lenei Maota i ona tulaga faalupe.

Lau Afioga i le Fofoga Fetalai, e muamua lava ona ou faafetai i le Afioga i le Minisita e ana le Tulafono ona o lenei Tulafono ua taatia nei i luga o le Laulau-a-Fono, o le tele ia o lona taua, ae ua talafeagai le taimi ua tuuina mai ai le Tulafono lenei ma mea o lo o tutupu i le lalolagi, aemaise o si o tatou atunuu, i le faamai e pei ona silafia uma lava e le mamalu o le atunuu faapea foi le lalolagi atoa. Ou te lagona ai le agaga fiafia ma le agaga faafetai, ona o lea ua aumai le Tulafono ae ua talafeagai tonu lava ma le feagai ai o le tatou atunuu ma le faamai lenei. Ona o lea ou te vaavaai atu i le Tulafono, o la e i ai le tulaga lea o faitioga faapena foi i totogi. A silasila i ai lau Afioga i le Fofoga Fetalai, e tele lava ituaiga faitioga. A o le matau atu a lou nei sui usufono i le tele o faitioga ia e aumai i fomai faapea foi i tausisoifua, ona o a latou ovataimi ua le mafai ona totogiina. E faapea foi i penisini ma tulaga faapena i le faatinoina o lenei auaunaga, ua le lava ni seleni e tatau ona faatino ai le auaunaga.

E pei o le agaga taua lea ia te au lau Afioga i le Fofoga Fetalai, ona o lea ua matau atu i le tele o meaalofoa tau tupe mai le Malo Afaatasi, e faapea foi i Malo tetele o le lalolagi, o lea ua tuuina sao mai lava i si o tatou atunuu

ona o le faamai. E tasi lenei itu taua ua amata ai ona tilotilo i ai le tele o Malo tetele o le lalolagi, o le faia lea o se totogi ua taua o le hazard pay, po o se additional pay. O le totogi lea e tuuina atu ia i latou, e ese mai le totogi o lo o totogiina ai, i e o lo o faatinoina ni tiute e lamatia ai lo latou soifua, aemaise o le latou valaauina, e faapea foi ma le latou tautoga seia oo lava ina maliu ai. O le totogi lea e tau o le hazard pay, o le additional pay lea e ao ona tilotilo i ai lo tatou Malo, e tataua ona tuuina atu tonu lava ia i latou o lo o faatinoina lenei auaunaga. E le o se totogi foi e faalauaitele i so o se tagata. Ma o lea ua matau atu i le toatele o atunuu o le lalolagi, o lea latou te faaaogaina le totogi lea, le tulaga lea. E apply sao lava le vaega tupe lea. O le taua e pei ona ou fai atu i le taua, o la e faalogologo mai atunuu e ona meaalofa nei o lea na aumai ona o le faamai, ona o lea latou te faatinoina le tulaga lea. O lea e alu sao lava le tupe lea i la foi atunuu ia i latou e faatinoina se auaunaga e ono aafia ai le soifua ma le ola seia oo lava ina maliu ai le tagata faigaluega e tusa ai ma lona valaauina.

O se tala faataitai, e pei foi o tagata i totonu o le militeli po o fitafita. E pau lava le tagata e apply sao i ai le tupe lea, o tagata o lea e tauina le taua, ae a fai lava o isi fitafita o la e tiute i Alaska po o fea isi atunuu, e le apply i ai latou. E na o i latou lava o lea e tauina le taua. E faapea foi i fomai ma nurses ma tagata faapena ma fuimu o lo o i totonu o tulaga faapea, e alu sao lava i ai le vaegatupe lea.

O lona uiga ua tataua ma onomea lau Afioga i le Minisita ona silasila ane i le tulaga lea, ua tataua ona faia se vaegatupe e pei o le tulaga lea e faatino i la foi atunuu, e ese mai i le totogi e ese mai i le ovataimi, aemaise o le a se tau i o tagata e tulai mai ai ma motusia ai le soifua ma le ola, ona o le faatinoina o le auaunaga. Atonu e fou i le tatou atunuu le tulaga lea...

Afioga Hon Valasi Luapitofanua Toogamaga Tafito Selesese (Minisita o le Soifua Maloloina): Lau Afioga i le Fofoga Fetalai, o le mea e fia faasao.

FOFOGA FETALAI: Ia onosai mai le sui usufono mamalu mai Faasaleleaga 5.

Ia tulai mai lau Afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito: Sa le faalavelave lava i le saunoaga matagofie a le sui usufono, ae le mafai ona tuuaunoina, o lea e saua i taliga ma le faafofoga. O lea e fitoitonu lana faitioga i le Soifua Maloloina, ma faapea mai ua le utua taavale, ua le totogia... e matuia le tuuaiga. O ituaiga tuuaiga ia o la e aumai i tua i tala. A o le molimau a le Minisita, o lea foi e taoto le pepa a le Minisita mo tau i nei o risk allowance ua leva ona fai ae tou te le i faia. O lea la ua tilotilo lelei i le vai tau lenei o risk allowance lea e te tau mimilo mai isi vaega.

Ae ou te fautuaina le sui usufono, ia saunoa sao, leaga e leaga le faatu o le lafo e aumai faamaoniga o mea ia e saunoa ai. Afai o i ai sona sootaga, po o sana teine fomai se i tulou, po o le a lava, aua le faalogo i ai, ae faalogo i le Minisita lea sa... talu ai nei lava sa... e le misilau asiasi i Salafai ma le tele o falemai la e faafofoga mai. E fautuaina o a mai? E leai lava se mea faapea, a o le faiga lava lea o le sui usufono, e taumafai lava e milomilo nai vaega, ae ou te fautuaina, ne i te i ua faatu se lafo i le aso, aumai la faamaumauga nei lea e talanoa i ai, aumai mea sao ae le o aumaia o mea o tala faalogo. O lea foi ua taoto le pepa i le Kapeneta, sa tilotilo manino i mea nei o alauni o tagata nei e feagai, leaga e eseese mea e taua o risk allowance, e eseese. A o lea ua taumafai i se faiga ina ia mafai ona faafoe malie ma fetuunai ai tulaga faapena.

Lau Afioga i le Fofoga Fetalai, o le ala lena, ou te fautuaina le sui usufono e aloalose mai mea o tala, aua o le tagata e faalogo i tala, [.....] mea o ituaiga foi lele e faalogo i tala ae le aumai ni mea anoa ne i maumau lona taimi. Ia manuia le aso.

FOFOGA FETALAI: Malo faafetai i le Afioga i le sui usufono mamalu o lea ua tali se isi vaega o le saunoaga. Atonu o lea ua tali manino foi le Minisita, aua o le aotelega o lou finagalo e pei o mea ia o hazard allowance, ia a o lea ua saunoa le Minisita o le risk allowance, ia o le risk allowance lava lea e faaoga e le tatou atunuu i lena taimi lea e faaoga e le Ofisa o Leoleo ma nisi Ofisa o le tatou atunuu. Ae o lea ua manino, o lea foi ua saunoa, leaga e sao foi le Minisita o lea ua tuuaia le Matagaluega i nisi o taavale e le utua, ae o la e faafofoga mai le Minisita ma le afaigaluega, ia o tulaga na e poipoi foi ma tatou puipui i le afaigaluega aemaise lava le faafofogaaga a le atunuu ina ia tatou talanoa i mea taua ma mea anoa ma mea faamaoni i totonu o le Palemene lena.

Ia tulai mai le sui usufono mamalu e faaauau le saunoaga.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai mo le faasaoina o le taimi o le sui usufono mamalu. Ia, o le sui usufono lena e tumu i le ava i le Maota lena. E matau atu i le saunoaga a le Afioga i le Minisita lea faatoa maui atu e lagona ai lava le faanoanoa. E pei o le agaga lena i lau Afioga, leaga o lea e faalogologo le atunuu i saunoaga ia a o lea e faafofoga mai le sui usufono mamalu.

FOFOGA FETALAI: Ia, se i faafofoga mai le sui usufono. Faafofoga mai le sui usufono mamalu, alaala mai lalo. O le a tauau ina fesopoai a tatou galuega. O le Tulafono Tumau, a e fia faauilavea ona ui mai lea i le Fofoga Fetalai ona avatu ai lea o le faatagaga. A o lea foi ua e see foi e faasea i le Minisita, ae le o i ai i le tatou Tulafono Tumau le tulaga lena. E le mafai ona faasaga se isi faasea i se isi faasea. O le Minisita la e tali i o i... E te agai i o

ia Peseta, ae le o le Minisita. O se taimi, ona saunoa lea o le... pe oo atu foi i lou taimi, ia o le tulaga lena. A o le taimi lenei, ia ou te le faatagaina lau faauilavea i le taimi lenei le sui usufono mamalu.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, e malamalama lelei le sui usufono lenei, ae o le saunoaga lea e faatusa i le fai o se papa, o le agaga lena lea na ou tulai atu ai i lau Afioga. E le logomalie i le sui usufono lenei. E pei o le agaga lena i lau Afioga ia malie ai lau Afioga i le Fofoga Fetalai.

FOFOGA FETALAI: Ia, faafetai o lea ua maua atu le tulaga o le... Ia, e fautuaina foi le tulaga o le tatou Maota, aemaise foi o tulaga o upu faapenei felafoai i totonu o le Maota, a o faafogafoga mai foi le paia o le atunuu.

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, o se mea e fia faasao.

FOFOGA FETALAI: Se i tulai mai lau Afioga i le Minisita, e i ai se...

Afioga Hon Valasi Luapitofanua Toogamaga Tafito Selesele: E leai se agaga e alualua se tala, o le sui usufono foi o le sui usufono matua i le Maota. Ae a faaleaga lava ma faauiga e le tagata e leaga se upu, o ia lava ma lana faauigaga. A o lea e fautua atu i le Minisita. Ia, lau Afioga, o le a fai ni ai o le tulai mai o le sui usufono, aveese la le papa, ae fautuaina, aumai mea sao. Ia manuia le aso.

[Upu na aveese mai faamaumauga o le saunoaga a le Minisita o le Soifua Maloloina *“ua tatau ona fai sona papa, vaeatu le...”*]

FOFOGA FETALAI: Ia o lea ua e faafogafoga mai le sui usufono mamalu, o lea ua tuueseina e le Afioga i le Minisita le upu lea na tuuina mai, a o lea ua sui, aumai mea sao ma mea faamaoni. Ia, tulai mai lau Afioga i le sui usufono mamalu o Faasaleleaga 5.

Afioga PESETA VAIFOU TEVAGAENA: Lau Afioga i le Fofoga Fetalai, e fautuaina le Minisita, se faalogo faalelei, faalogo i upu o lauga ae le o lou tu mai lava e sau faapena ia te au. Masalo a e malamalama i le Tulafono lea e taumafai e avatu, o le Tulafono e manuia ai le Matagaluega. Ae le faapea ua ou faaleaga atua lau Afioga ma le Matagaluega. O le vaiaso lea na tea na sau i le TV1, faasea mai le Taitai, o le Peresetene a le Nurse

Association a la outou Matagaluega i le le totogia o taavale, leai ni penisini ua tutu. E sese la upu ia e tautala atu ai le sui usufono lenei?

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, e le tuua mama e le Minisita le mea lea ma le Malo.

FOFOGA FETALAI: Ioe, ou te fesoasoani atu foi i le sui usufono mamalu ma lau Afioga i le Minisita, ia mau pea le toovae o le tatou taualumaga mo le tatou Fonotaga. E fautua pea le Nofoa ina ia tatou talanoa pea i tulaga mamalu ma tulaga aloaia aemaise foi le faafogafoga mai a le atunuu aemaise o le Matagaluega. O le mea lea lau Afioga i le Minisita, e i ai le manatu ia saunoa foi e faamaea lea mataupu ia tuumamaina i le faafogafoga mai a le atunuu. Ma le faaaloalo.

Afioga Hon Valasi Luapitofanua Toogamaga Tafito Selesele: Ia lelei lau Afioga i le Fofoga Fetalai. O lou lava sui usufono e le o se tagata e faamisa, o se tagata e tuualalo. Lau Afioga i le sui usufono, afai ua tee le uluga, e faamalulu atu. O lau saunoaga lea i le TV ma mea faapena, na oo mai lava lipoti ia te au i Salafai, sa ou fesootai lava i le pulega, e le tau alu se Minisita e fai ni galuega faapena, o lo o i ai tagata galulue, a o lipoti ia e aumai, e leai ma se mea faapena na tupu. Atonu la e i ai ni nai mea faapena na e faafogafoga i ai, a o le mea sili ma le taua, o lena sa e faafogafoga i le Peresetene ma lana interview, a o le Minisita lea sa tuualalo atu i Salafai aemaise foi sa ou fesiligia le Minisita o Tupe. So o se taimi lava e aumai ai se complain e fesootai lava i le Minisita o Tupe, e moni le mea lea faapea ua le utuga.

O le ala lea lau Afioga, aloese ia ma na fautuaga ae aua le... o le a avea ma mea e te'i ua leaga ai fua lou loto ia te au, ae lelei lava le ta mafutaga. Ia manuia le aso, faaauau le lauga.

FOFOGA FETALAI: Malo faafetai. Le sui usufono mamalu, o oe foi o le tasi o sui usufono matua o le Maota. E talitonu foi le Nofoa o le a faaseese i la lea tulaga, ae tatou talanoa foi i le mamalu o le Palemene ma ona tulaga e tatau ona tatou i ai, e faapena.

E i ai le manatu, le sui usufono mamalu, ia tulai maia e faaauau le saunoaga.

Afioga PESETA VAIFOU TEVAGAENA: Ia, e avea foi lenei avanoa e faamalulu atu foi i lau Afioga i le Minisita. E talitonu lava i le faafogafoga foi a lenei Maota aemaise le tapuaiga a le atunuu, e le mafai e lou sui usufono ona soona laga se mataupu e le mautinoa po o se mataupu ou te talitonu e afaina ai lou sui usufono i le Maota lenei. Ou te tautala lava i mea amiotonu,

e le mafai ona ou soona... ua lava foi lou taimi i totonu o le Maota lenei ua ou malamalama foi i Tulafono a le Maota.

Ae faafetai foi i lau Afioga i le Fofoga Fetalai, ona o le lava o le taimi e tuuavanoa mai ia i matou e vaavaai ai i le Tulafono, le taua. Na ala ona ou avatu lau Afioga i le Minisita o le Soifua Maloloina le Tulafono lea, leai e le na o lau Matagaluega i le tatou atunuu e ana le Tulafono. O lea ou te uua le pepa lea e aafia uma ai lava, its all the International Act, le mea lea. E mulimulitai i ai Labour Act a atunuu i mea tau totogi. Aua o le mea lea e ala ai ona faasea le toatele o tagata lautele ma tagata faigaluega o totogi.

O le upu lea o le hazard pay, o le totogi e faapitoa lava i se auunaga e faatinoina ae tulai mai ai le maliu ma le oti. O lona uiga, it's a temporary extra pay, e le faapea e totogi ai lava tumau e oo mai i le faavavau. E leai. Ae a pei ona ou fai atu, o le totogi lea o la e faatino e atunuu la, na o e lava, e pei la o lea o le a ala ai ona aafia lau Matagaluega lau Afioga, leaga o le Matagaluega tonu lava lea o lea e agai i ai le tilotilo a le tele o Malo, ona o le faamai lea ua aafia le atunuu lenei, o le faamai oti, o le faamai oti.

Tofa Lealailepule Rimoni Aiafi: Lau Afioga i le Fofoga Fetalai...

Afioga PESETA VAIFOU TEVAGAENA: O i latou la ia e galulue i le faamai lenei, o fomai ma tausisoifua.

FOFOGA FETALAI: Ia onosai mai le sui usufono mamalu mai Faasaleleaga 5.

Afioga PESETA VAIFOU TEVAGAENA: E le o tagofia e le lautele o le atunuu ma tatou togafitiga o tagata pe a aafia le soifua maloloina lau Afioga.

FOFOGA FETALAI: Ia, se i tulai mai le sui usufono mamalu mo Faleata 3.

Tofa Lealailepule Rimoni Aiafi: Leai, e faafetai lava i lau Afioga mo le avanoa. Na ona fia malamalama lava i le saunoaga a le Afioga i le sui usufono mamalu, pe o le mea lea pe le tutusa le mea lea o le hazard allowance aua pei faatoa ta faalogo foi lea o ita i ai, ma le risk allowance, pe le o le mea lava e tasi. Faamolemole lava.

FOFOGA FETALAI: Ia, e taua foi le fesili lea a Faleata 3 lau Afioga i le sui usufono mamalu, aua pei ona taua foi e le Nofoa, o le risk lea e faaoga e tatou, a o le hazard la, pe ua i ai ni totogi faapena i lenei taimi i le tatou atunuu pe le i oo mai, pei o le fautuaga mo le agai i luma.

Se i tulai mai le sui usufono mo Anoamaa 1.

Afioga Alaiasa Moefaauouo Malagaitutogiai Sepulona Moananu (Anoamaa 1): Lau Afioga i le Fofoga Fetalai, ou te molimau atu i le tele o le tapenaga o lea e i luma o le sui usufono mamalu leaga o lea ma te sosoo, e sao ma faamaoni le tulaga lea ua tapena i ai le sui usufono, a o se mea e taua foi i lona finagalo aua le tatou atunuu. O le mea lea ou te faatu ai se lafo, e tataua ona faaoga mea ia ua tapena i ai le sui usufono pe a finagalo i ai le Afioga i le Minisita. Ae leaga o lea o le a ta le tatou malologa, ia faafetai mo lou avanoa.

FOFOGA FETALAI: Faafetai. Tulai mai le sui usufono mamalu. Ia se i onosai mai lava le Afioga i le sui usufono mamalu se i tulai mai lava lau Afioga i le Minisita.

Tofa Hon Leatinuu Wayne Soialo: Lau Afioga i le Fofoga Fetalai... Faafetai lava. Leaga o lea e faamaumau faamaumaga o le lauga matagofie a le Afioga i le sui usufono, pe mafai la ona tuu i ai ma avemasini ma aveloli i totonu o le hazard pay, ina ia aua ai ne i misi lava se isi o aafia le soifua i tulaga ia. E lelei foi... e manaia ia o le fautuaga, ae na ona faapena atu, i te'i ua aumai le Tulafono ae aoga i au avemasini ma au aveloli, ina ia mafai ai ona tuu i ai i lalo. Ma le faaaloalo lava faafetai.

FOFOGA FETALAI: Ia, faafetai o lea ua... E i ai le agaga i lau Afioga i le sui usufono mamalu mo Faasaleleaga, ia tulai maia e faaauau lau saunoaga.

Afioga PESETA VAIFOU TEVAGAENA: Lau Afioga, o lea na saunoa nei si ou uso a sui usufono i le tulaga lea e pei o le risk. Ioe. O le definition lena o le hazard e lavea atu ai lava ma le risk. O mea uma lava e aafia ai le soifua, e pei e patino lava le Tulafono lea lau Afioga i tagata e faatinoina le auaunaga e ono aafia ai le soifua ma le ola ma iu lava ina maluu ai. O lona uiga, e le o le totogi foi lea pei o ovataimi, e ese lava le ovataimi, a ia tataua foi ona silasila i se tau e ao ona mauaina e i latou o le a maliliu ona o le latou tautoga ma le valaauina.

Ia o le isi foi faamanuiaga tele o le tulaga lea pe a alofa lau Afioga i le Minisita e tuu i ai, e le na o i latou foi e faatinoina, e oo foi i le Minisita. O le mea la lea e le iloa e lou uso a Minisita lea na tu mai nei, o ia le isi tagata manuia i le Tulafono lea, leaga o lana Matagaluega e aafia ai ma ia. E ui i lea lau Afioga i le Fofoga Fetalai, ua lava lea, ioe. Ua lava lea faamatalaga o le Tulafono...

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, na o se mea e fia faasao.

FOFOGA FETALAI: Onosai mai lava le sui usufono mamalu. Se i tulai mai lau Afioga i le Minisita.

Afioga Hon Valasi Luapitofanua Toogamaga Tafito Selesele: E ese le manaia o le saafiafiga a le sui usufono, ae pei ua ou toe tu atu ona o lona lima lea e tusi mai ia au. O lea la faatoa manino, ana le fesili le sui usufono mo Faleata 3 i le risk allowance, e oo lava i le sui usufono e le malamalama i lana mataupu. O lea la ua manino, ae aua te popole, o lea ua taoto le pepa a le Minisita, leaga e le o manao le Minisita e tau ai ma ia, e leai, mo tagata. Ua leva ona taoto e tataua ona fai risk allowance nei. Ae o le a e silasila ma e faafofoga i se taimi, o la e faafofoga mai e o le... ae aua e te popole, o lea faatoa manino, ana le tulai le sui usufono mo Faleata 3. A e le manino la... ia faauma ia le lauga a le sui usufono. Faafetai.

FOFOGA FETALAI: Faafetai o lea ua maua atu le agaga. Ou te talitonu foi o lea ua faaiu mai le saunoaga a le sui usufono, o lea ua malamalama foi i le tulaga o le hazard allowance lea na faatu mai. Se i toe tulai mai lau Afioga i le sui usufono e faauma mai lau saunoaga ua oo foi i le taimi o le tatou malologa.

Afioga PESETA VAIFOU TEVAGAENA: Lau Afioga, ia, aua o lea ou te vaai atu e tele tatou tupe lea e faameaalofa mai fafo, ia faaopoopo i ai, o le risk allowance, hazard allowance, o ituaiga alauni eseese, ua tataua ona aumai e faatino e ave e totogi ai i latou nei. Aua o le mea moni lava lau Afioga i le Fofoga Fetalai, e malamalama lelei atunuu ia mai fafo e ona tupe nei e lafo mai i le tulaga lea ou te tulai atu ai, leaga o la e latou te faatinoina ia i latou o lo o galulue i le auaunaga lea, aemaise lava le tulaga tau le faamai lea ua tatou i ai. E pei la o le tulaga lea. Ae lau Afioga i le Minisita i le tulaga lea tau avemasini, ia tasi lena vaega. Ioe. A faapea o lea e te finagalo e totogi e le Malo insure ma tulaga faapena o employer eseese foi ia. Ia o le a le mea e tuu ai o mea lelei na? Ia ua uma le lauga a lena itumalo lau Afioga i le Fofoga Fetalai. Ia manuia le Fono.

FOFOGA FETALAI: Faafetai. Malo saunoa i lau Afioga i le sui usufono mai Faasaleleaga 5. Ia, ou te talitonu foi o lea ua maua lelei e le Afioga i le Minisita, o lea foi ua saunoa manino le Minisita o le Soifua Maloloina, o la e ua taatia le pepa i le Kapeneta, a o lea ua silasila foi le Kapeneta i tulaga uma ia ua e laga. Ae faafetai mo lou sao, o lea ua faafofoga foi ma le totoa le Minisita ma le Malo, ia o le sao lava mo le manuia o tatou tagata aemaise lava le tatou frontliners lea e tulai mai lena vaitaimi i le tatou faamai.

Ia talu ai o lea ua tatou oo mai i le tatou malologa masani o le taeao, ia o le a faataatiaese tatou Galuega mo lana malologa masani o le taeao ona faaauau ai lea o le tatou galuega i se tasi o sui usufono. Ma le agaga faaaloalo.

Na faataatiaese Taulumaga a le Fono Aoaofaitulafono mo lana malologa masani i le itula e 10:46 i le taeao ma toe faaauau i le itula e 11:30 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono. Ua tatou toe taliu mai i le malologa, e i ai foi le manatu ua maua se faasiligamalosia e ala i le taligasua sa feagai ai ma le tatou Maota. Ia, ae i ai pea se fautuaga a le Nofoa e ao pea ona avatu a o le i faaauauina tatou taulumaga i leni itula o le aso.

Ia, o le faamanatu lava i tatou Tulafono Tumau 82 ona o tatou faauilavea. E manatu lava o le tulaga foi lea o le mamalu foi lea o le tatou Palemene, e ao lava ona tatou usitaia tatou Tulafono Tumau e uiga i tatou faauilavea. O lo o manino lava, a fia faauilavea se sui usufono, e ao lava ona ui mai i le Fofoga Fetalai, le Nofoa ona faatoa avatu lea o se avanoa, ona e le faigofie foi le Nofoa ona faamotusia se saunoaga a se sui usufono mamalu o saunoa. E ao foi ona faanoioi foi le Nofoa i le o lo o saunoa ina ia tuu mai se avanoa mo se faauilavea. O le ala foi lena e le mamatia foi i le Nofoa le mamalu o lo outou mamalu ma Nofoa o le Palemene. E talitonu foi o lo o ia te outou uma o sui usufono mamalu loto ma finagalo ma faamoemoe o tatou itumalo uma lava. A outou silasila mai foi i le Nofoa, e le o faaogaina lava aulape o lo o i totonu o Tulafono Tumau ona o le ava atu, e alofa atu i Nofoa o tatou itumalo o lo o taputapu mai.

O le mea lea, o se fautuaga faifaimalie lena ua tuu atu e le Nofoa ina ia tatou galulue faatasi mo le tatou galuega, aemaise lava o le tulaga mamalu, o lea e faafogafoga mai le mamalu o le atunuu, a tatou felautoai, o i ina ua le maua ai se toamalie ma se toafilemu o le atunuu. O le uiga lena o le tatalo atu, ia e le o tuua lava avanoa pe a faauilavea lo outou mamalu, ae ia tatou ui pea i ala o le Tulafono ina ia faafaigofie ma mamalu ai taulumaga o le tatou Palemene.

Ia o se fautuaga lea, ae talitonu foi, e fesoasoani atu ai. O le agaga lava ia, ia sao ma uli taulumaga o le Fono Aoaofaitulafono, o le taua lea o tulaga o tatou Tulafono Tumau, aemaise foi o le taputapu mai o le tatou atunuu ina ia sologa manuia Fonotaga a ona taitai i ona tulaga uma. O le mea lea, o le faasilasilaga lea i le tatou Maota.

E faia le tatou malologa ua maea saunoaga a le sui usufono mo Faasaleleaga 5. Ia ma o le avanoa leni mo se tasi o sui usufono e fia sausaunoa.

Ia, o lea ua ou vaai atu o lea ua fou mai le sa o le Afioga i le Sui Fofoga Fetalai, ia o le sui usufono mo Aiga i le Tai. Saunoa lau Afioga i le sui usufono mamalu.

Afioga AUUAPAAU MULIPOLA ALOITAFUA MULIPOLA (Aiga i le Tai): E fia fonofaapipii i le faafetai ua siitia e lau Afioga i le Fofoga

Fetalai, ona ua maea foi ona paleauau le taliga o le sua i lenei vaega o le aso. I lau Afioga i le Tamaitai Palemia ma lau Kapeneta filifilia, e faapea foi le Afioga i le Taitai o le Itu Agai ma le Sui Taitai ma lena Itu o le Maota nei.

E fia faaleo se motugaafa a lenei itumalo i le Tulafono ua taatia ne ii le Laulau-a-Fono a le Maota, le Tulafono Tau Faaofi lea o Teuteuga o le Tulafono o Sootaga Va lelei o Leipa ma Galuega 2022. E le tele se manatu, peitai, e momoli le faafetai i lau Afioga i le Minisita e ou le Tulafono.

Ae fia talanoa i le vaega o le Tulafono o lo o taua ai ma faatulaga le matua o le tagata po o le tamaitiiti e ono faafaigaluegaina. Ia, le itumalo pe le Aiga i le Tai, tapuai maia se i fai so tatou sao ia Manuvao i lenei Tulafono Tau Faaofi.

Ua ou matau i le Tulafono i le faapea mai o se vaega o le Tulafono, o le faafaigaluegaina o tamaiti e le i lalo ifo o le 13 tausaga. E amata sau faitau ma le faaleoina o sou manatu i le tulaga lea, ona a ou matau i le faagasologa maiga o le soifuaga o outou alo ma fanau aoga e tuuina atu i aoaoga, e i ai lava vaega o le soifua o le tamaitiiti e ausia e lona malosiaiga, ia ma le aoaoina lelei e le faiaoga i totonu o potu aoga. O le tamaitiiti la lea e 13 tausaga, e manatu lava, e le au lona tomai i isi tausaga la i luga atu. Faataitaiga a faapea o le 13 tausaga, e fua foi la i ai le curriculum foi lele e aoaoina ai tamaiti e le faiaoga i le matua o le soifua o le tamaitiiti. A o le tele foi o aoaoga i totonu o le tatou atunuu, e pei e tele lava ina theory foi lele le avega o mataupu i tamaiti. Fua la se faamatalaga i le tamaitiiti lea e 13 tausaga pei ona ou fai atu, o lea ua maua e lou sui usufono, e mafai ona faafaigaluegaina i totonu o aiga, ae i ai lava tuutuuga taua lea e tau mai e le Tulafono ina ia faapepaina le va nonofo ai o le tamaitiiti lea ma le tagata e ona le falefaigaluega. Ia pe i ai foi so la sootaga vavalalata lava, po o le tamaitiiti i lona matua o se sootaga sili lea ona vavalalata, ae po o le tamaitiiti foi i sona uncle po o sona aunty, e vavalalata foi lea sootaga.

Na pau lava la o le mea e tau avatu ai se manatu ou te faafetai ai i le Tulafono ma lona faavaeina, i le tamaitiiti lea e le i lalo ifo o le 13 tausaga, e mafai ona faafaigaluegaina i totonu o le faleoloa foi lele o lona tama po o lona tina, ia po o le faleoloa o lona aunty po o se sootaga faaleaiga vavalalata, ae tapena uma lava tulaga foi lele ia aua ne i i ai se mea foi lele e faaletonu ai le tuuina atu o le faamanuiaga ia te ia, e ui na o le 13 tausaga.

I lou la manatu e i ai, o le tele ia o le aoaoga lea, e le gata i totonu o le lotoifale o tatou aiga, a o se aoaoga foi lele mo se faataitaiga a faapea e faapea atu, sau e alu e weigh le product lea po o le a le mamafa i luga o le fua lea. Aua e le natia, ua auai mai aso nei, ua i ai suiga i le faitauina o oloa ma le fuaina o le mamafa ma isi ituaiga metric system foi lele ua faaoga i aso nei lea ua mou atu le pauna, a o lea ua sau le mamafa o le kilograms. E pei la o le taua lena o le Tulafono lea. O le galuega lea e faatino mai ma o lea e aumai e le Tulafono, o galuega mama. A o galuega mama ia, o lea e momoli mai ai le feau faaola mafaufau i le tamaitiiti lea. Ia ona fua lea o le

suka, se i tulou lava le Maota, aveane, ia, e tasi le kilo ae ua ova atu ma le lua. Fesili le tamaitiiti, o le a le uiga o lea mea ua ova atu ma le kilo a o lea e 2.2pauna? A la le aoga lena, faafaigaluega i galuega mama e enhance ai le skills o le tamaitiiti, ma o i la ua iloa tonu ai lava e le tamaitiiti le mea lea ua weigh i luga o le fua. A tasi le kilo 2.2pauna. O galuega mama, a o lona siosiomaga, e le o afaina lava. Le siosiomaga lea o le tamaitiiti e le i lalo ifo ma le 13 tausaga.

Le tamaitiiti lea e faapea mai le Tulafono e 16 tausaga, e tataua ona faafaigaluega, ia o le isi foi la lea categories ou te faafetai ai i le Tulafono lea, ma e tumau pea la lou lagona, o se Tulafono e le gata e le na o le taimi e uma ai le meaaoga a le tamaitiiti i lo la va nonofo ma le faiaoga i totonu o le faleaoga, ae i ai lava le gagana a le isi matua na ou faalogo i ai, e iloa lava le tamaitiiti foi lele ona e alu ma ave le laupapa i le faleaoga. Le tamaitiiti foi la lea 16 tausaga, e mafai ona faapea atu le tina i lana tama, sau, sau e vaai le ta falesuisui lea se i ou faasino atua ia te oe pe faapefea ona fua le falesuisui lea. O le tulafono foi o le falesuisui, e fua le ofu i le ie, tasi lena taua o le galuega mama lea e aumai e le Tulafono. Ou te matua faafetai ai lava i le Tulafono lea, aua a oo ina siisii la le soifuaga o le tamaitiiti aoga, e matua mafatotoga lava le tamaitiiti i le siisii o lona soifuaga i luga seia oo i nisi tulaga ua tausaiaga, a o lea ua mafatotoga i le mea lea ua fua atu.

A oo mai foi la lau matau ma le motugaafa a lenei itumalo i le Tulafono lea e faapea mai e faafaigaluega ai le tamaitiiti e 18 tausaga, ia, e ese le manaia, pei lava ona ou fai atu, ua amata ona laa le soifuaga i luga. E mafua i sea? Aua o la e mafai e le tamaitiiti i le soifuaga faatamatane ona alu observe i le faleinisinia o lona tama, ona faapea atu lea o lona tama, sau ia, o le uaea lea e sosoo ma le uaea ola e ala ai ona ola le tatou taavale, ia ma nisi lava tulaga. Ae i ai lava le mea e toso ai le laina, aua le faaeea le 18 tausaga o le tamatane lea i se vaafagota mo ni faamoemoega o le gataifale. Aisea? Leaga o tulaga maaleale ia tatou te le mautinoa.

O itu lelei ia o le Tulafono o lea ou te tilotilo au i ai i itu lelei o le Tulafono, ae le satia ai le Tulafono foi lea tatou te tautu lava ina ia ave a tatou fanau i le aoga, le Compulsory Education Act. E leai lava ma se fesootaiga o le Tulafono lelei lenei ona itutino ma le Tulafono lea. Aua foi la tatou te siaki ma siaki e le Matagaluega ma fautua atu i lau Afioga i le Minisita, a o i ai ni tamaiti e maua atu i totonu o faleoloa ma galuega mama nei i le taimi o aoga, ia, o le faaletonu la lena o le tagata faigaluega. A o le Tulafono lava ia i le tilotilo a Aiga i le Tai i le Tulafono lenei, e ese le manaia, leaga o se Tulafono foi sa ou vaaia i atunuu mamao pe a ou asiasi i ou aiga ma ou tagata o ou aiga, e ese le manaia, ma e puipui foi. O lea foi ou te tilotilo i le anoliu o le Tulafono, e tapena le tagata faigaluega e le tagata e ona le galuega, le fale e faamautu ai le tagata lea o le a faigaluega. E leai lava ma se mea e satia ai lona nofo lelei. E oo foi i lona faaogaina o fesootaiga i fafo pe a

faapea o le a mau i totonu o le premises po o le lotoa lea e i ai galuega ia, e malutia lelei i mea uma lava.

O le mea lea, ia ou te faafetai i lau Afioga i le Minisita i lenei Tulafono. Ia, e talu ai ona e i ai nisi foi alauni ia na ou faalogo atu i nisi foi sui usufono mamalu o le Maota o faatutu mai ai le risk allowance po o a isi ituaiga, hazard allowance... Na o se fautuaga, e le fai ai ae tuu atu i tafatafa o lau Afioga i le Minisita, e i ai foi isi ituaiga alauni na ota faigaluega foi ota faalogo i ai, ia na ona avatu pea i luma o lau Afioga e i ai foi le alauli foi lele sa ta maua a o ota faigaluega o le Higher Duty Allowance, pe le gafatia foi la ona faatino i se galuega foi lele, pei o se alauni foi lele a see atu le tagata lea i lalo i le tulaga tau le galuega e faatino le galuega a le isi kesi la e i luga atu e muamua ia te ia, pei a la sa fai ni nai pasene foi lele leaga o le isi mamafa la e ua faaopoopo atu ia te ia. E ui e le i allocate ina ia i le kesi lea, ae pei e faapena se agaga, e tuu atu i tafatafa o lau Afioga i le Minisita a faapea e talia, ia faafetai.

A o le aoatetele lava o le Tulafono lau Afioga i le Fofoga Fetalai, ua talia lelei e lenei itumalo. Ma o le alafua foi lea e faavasega ai e lou sui usufono o lou itumalo i galuega faapenei, aua fanau aoaoina. Tatou talia mai le tatou poloketi e le o toe mamao a o tulaga aoatetele lea.

Faafetai i lau Afioga i le Fofoga Fetalai, faafetai i lau Afioga i le Minisita e ou le Tulafono. Ia manuia le Fonousu a Samoa i lenei taeao. Faafetai.

FOFOGA FETALAI: Malo saunoa i lau Afioga i le sui usufono mamalu mai Aiga i le Tai, o lau Afioga foi i le Sui Fofoga Fetalai. Atonu o lea foi ua faafofoga ma le totoa le Afioga i le Minisita, aemaise foi le Pulega o le Matagaluega aua lava fautuaga e pei ona faataatia mai.

Ia o le avanoa lenei mo se tasi o sui usufono mamalu. Ia, o lea ua matau atu o lea ua tulai mai le sui usufono mo Aleipata Itupa i Luga, lau Afioga i le sui usufono mamalu, o lou avanoa lenei.

Afioga FUAAVA SULUIMALO AMATAGA (Aleipata Itupa i Luga): Ua faafetai atu i lau Afioga i le Fofoga Fetalai mo le avanoa foi o lenei sui usufono e fai atu ai foi se faamatalaga e tusa ai ma le Tulafono o lo o tatou talanoaina i lenei itula e agai lea i le Teuteuga o le Tulafono o Sootaga Va Lelei o Leipa ma Galuega 2022.

Ia ae o se avanoa taua foi lea e muamua ona ou faatulou atu ai i le paia o le Maota i lau Afioga i le Fofoga Fetalai, aemaise foi o le Afioga i le Palemia ma le mamalu o le Kapeneta, aemaise Minisita Lagolago, o le Taitai foi ma le Sui Taitai o lenei Vaega ma sui usufono mamalu uma o le Palemene, ia malo le soifua ma le lagi e mama i lenei taeao.

E faatalofa atu foi i paia o Samoa ua faafogafoga mai lava i le faa-Ao le Afioga i Le Ao Mamalu o le tatou Malo ma le masiofo, le Afioga foi i le Sui Tofia ma le faletua, aemaise foi i le Itu Fefaatauagai i le Itu i le Faamasinoga

ia le mamalu eseese uma o faafofoga mai ia aemaise foi si ou itumalo i ona tulaga faalupe. Ia tapuai maia ae se i taumafai se taumafaiga vaivai a le tou sui usufono e tusa ai foi ma le Tulafono ua talanoaina i le Maota Fono nei.

Lau Afioga o le agaga faafetai e tauala atu i lau Afioga i le Minisita e tusa ai ma le Tulafono ona e i ai le talitonuga o Samoa o le Samoa ua laalaa. O le Tulafono foi lea ua lauliliu nei ona teuteuga e le o se Tulafono foi ua leva atu o le 2013 lea ua toe lauliliu nei ona teuteuga. Ia ma e i ai le manatu foi lea o fesuaiga ma teuteuga o Tulafono e tatau ona talafeagai ma le taimi. O le taimi lea ua i ai ua talafegai. E tele aoaoga taua, tele mea sa tutupu mai a o faagasolo le Tulafono tuai lea i le 2013, ia aemaise foi o mea e tutupu i le olaga nei, olaga galue faafaigaluega aemaise foi o le va o tagata galulue ma i latou foi e ana galuega, employers and employees, i le tulaga lea e toe matimati ai teuteuga ina ia faapena ona sologa lelei ma agai pea i luma le lelei o le faatinoga o galuega aua o Samoa ua Samoa laalaa. E tupu le tamaoaiga, tupu le silafia ma le tomai, ia ua faapena foi ona tatou talanoa mai i luga i va o faigamalo ma tulaga uma faapea. E tatau foi la ona fua i ai teuteuga o tatou Tulafono e limataitaiina ai le tatou faigamalo ma le tatou tamaoaiga.

Ia ma o se tulaga foi lea o se tofamamao lea a le faigamalo ma lo tatou Maota, le Palemene, teuteu nei, ae atagia ai le manuia o taeao ma le lumanai. O se faataitaiga o le tulaga lea, e tau matau atu i le tulaga e pei ona i ai le agaga lea e fua le teuteuga o le Tulafono ia talafeagai ma le taimi.

O lau matau i Samoa i le taimi lenei i totonu o le faigamalo, o lau iloa ua ova ma le afa pe o se mea o le 60%, o Ofisa Sili o Pulega uma o Matagaluega a le Malo, o lea ua pulea e le itupa o tina ma tamaitai. O lea ua avea i latou ma Ofisa Sili o Pulega o tulaga ia. Ia ma o se tulaga e le i masani le tatou faigamalo ina ua amatamata mai i le tele o tausaga. Ia ae e pei o le tulaga lea ua i ai nei, ia ua sui lava le taitaiga o Matagaluega ma Faalapotopotoga Tumaoti aemaise foi Pisinisi Tumaoti, ia ma ua faapena lava ona i ai suiga ia. Ua agai i luma le silafia ma le tomai, aemaise foi o aiatatau ma avanoa tutusa o alii ma tamaitai e avea ma Ofisa Sili o Pulega. Ae ou te iloa foi la i le tulaga e pei ona i ai le tatou Palemene, e le o atagia tele ai le tulaga lea. Ia e pei foi la o se uiga o le faamatalaga, e pei o lea e i ai le teuteuga e pei ona i ai le tatou Faavae, ia taumafai ia gafatia le aofai o tina ma tamaitai i totonu o le Palemene lea ua i ai le suiga lea i le tatou Faavae i le 10%. E pei o le tulaga lea ia talafegai ma le taimi ona o le tele o Ofisa Sili o Pulega o Matagaluega ma Faalapotopotoga, ia ou te iloa o le isi taeao lea o Samoa. E oo atu i na taimi, ia ua fesui ai foi tatou Tulafono ua talafeagai ma lea tulaga.

O le tulaga lea e agai i ai se faamatalaga, aua o mea ia e toe tautatala ai lava alo ma fanau a Samoa i se taimi o lumanai i le mamao o le silasila a le Maota nei i le againa o Tulafono ia, ina ia faapena ona malupuipua aemaise le saogalemu o aiatatau a le mamalu o le aufaigaluega, aemaise foi i latou e ana galuega ina ia paleni uma tulaga ia.

E i ai le tulaga e pei e matau atu ua fua i ai le tapenaga o le Tulafono. E tele aoaoga i le faatulagaga ma le faatinoga o le Tulafono tuai, aemaise o aoaoga pei ona i ai Samoa i le faamai o le Koviti-19. O lea e i ai tulaga sa faapena ona tau le galulue nisi ona ua i ai ia tatou vavao ma ma sa. Ia ua tele ina galulue mai i fale atonu o se tulaga foi lea ua tilotilo ai foi le Minisita ma le Matagaluega ia faaleleia atili tulaga ia i le tulaga foi lea o lea ua tele o galuega ua mafai ona galue mai i le fale i le tulaga foi lea o le faatinoga o galuega. Ia atonu o se isi foi consideration lea po o se mea sa silasila foi ma tagatagai i le eseese o le galue i le Ofisa, ia ma le galue mai i aiga ia po o maota foi ma laoa.

E i ai la tulaga foi lea i si ou itumalo o la e faafogafoga mai, e i ai tulaga e le i tapena ma e le i sauni i ai aiga ma nisi o tagata faigaluega ona e pei foi lea ua faateia ua fai atu loa vavao ma sa, ae e le i iloga ona tapena le latou lotoifale i tulaga ia. O le faataitaiga o si ou itumalo ina ua leai ni aoga ae faagasolo tulaga foi o aoga ia e faaaoaga atu ai le initaneti, ia ua tau i ai faasea a nai faiaoga ua taugata resources, ia ona o le tele foi o aiga e le i sauni i ai, e le i tofu TV aemaise foi o le suega o le data e mafai ai ona maua e nai alo ma fanau aoaoga ia e faaaoaga atu ai le initaneti. Ia atonu o nai vaega uma ia e faalatele atu ai se faamatalaga o mea e taua o lea ua maua mai, ia e tapenapena i ai le tatou Tulafono ia aemaise ai foi tulaga ia e pei ona saunoa ai nisi o sui usufono, i tulaga ia o alauni i le lamatia o le soifua, lea e taua o le risk allowance, ia pe o le hazard allowance. Ia e taua foi nisi o vaega aua e fuafua i le ituaiga sectors ma le manaomia, e tau foi e le isi vaega o le wet allowance mo galuega ia o latou e susu mai i le taeao seia tau foi i le taimi e manava ai. Ae e pei o vaega uma ia e tele aoaoga ua maua mai i tulaga o mea o lo o feagai ma tatou i lenei vaitau e tai pei o le faamai o lo o i ai nei.

Ia atonu o se tulaga foi lea e taua ai le silasila pea ma mataitu nisi foi o aoaoga ma lesona e maua mai i nisi o polokalame ua uma ona faataatitia a lo tatou Malo aua le alualu pea i luma i le lumanai. Ia atonu o le isi polokalame taua lava lea i le Matagaluega ma le... aua o le polokalame lea e saili ma faatupulaia ai galuega. E faaleleia ai le ola lelei ma le tamaoaiga o aiga taitasi. O le vaega lea o le PACER PLUS pe o le agreement lea a le Pasefika lea e aafia ai Niu Sila ma Ausetalia. E tusa o le agreement lea i le Common Economic Relation. O lea ou te iloa o le tulaga lea e pei o se tulaga foi lea na fanau mai ina ua fai le trade agreement lea pei o le 2001 ea lea e tau o le PICTA, ia o le Agreement na a le Pasefika lava ia, ia lea ua amata ona negotiate ma fanau mai loa le PACER Plus, lea ua 2020 ma o lea ua i ai lona Ofisa iinei i Samoa, le tatou Implementation Unit ia ma o Samoa foi o le motu muamua lea o le Pasefika ua sainia muamua le agreement lea, ia muamua Niu Sila, lua Ausetalia, sosoo atu loa ma Samoa. E pei lava la ua maua le toaiva ua latalata i le toasefulu atumotu o le Pasefika o lea ua i ai.

O le tulaga la i aoaoga e pei ona maua mai po o lesona, ia lea la ua tupu lelei ma faatupulaia galuega i le tulaga lea o feafaatauaiga o lea ua i ai le

tulaga ia Niu Sila ma Ausetalia lea ua i ai le tatou RSE, ia ma ua faapena ona tulai mai le tatou tamaoiga. Ia e taua e le toe taua ia nisi o tulaga e pei ona faaalua foi e nisi o sui usufono mamalu e faapea o le a taofia, ia e pau lava se tuualalo a lenei itumalo, lau Afioga i le Minisita, ia auiliili pea tulaga e pei ona e saunoa ai, i le lauliliu foi o nisi o faafitauli ma tulaga faapena, ae o se matou tuualalo, ia faaauau pea le tatou polokalame, aua o lo o maua foi i nisi o faamaumauga, ia ua tele lava le agai i luga o le tatou kalafi foi lea i tatou remittance ia e aumai i atunuu mamao. Ia e moni lava o lo o toatele ia o tatou aiga o lafo mai, ia ae e pei na tele loa le numera lea o le tatou galuega faavaitaimi i le 8,000 ia pei na faapena foi na ae ai i luga le toatele foi o alo ma fanau nei, e toeitiiti lava o le 80% o lona totogi lea e agai sao mai lava i inei. O se isi vaega o lo o faaoga i tulaga e manaomia i o ma totogi ai latou pili o accomodation ia ma tulaga uma faapena.

Lau Afioga o le isi tulaga o le tulaga foi lea i tulaga faatapulaa lea ua uma foi ona faafofoga le Maota i finagalo foi o nisi sui usufono i le tulaga lea i le 13 years foi lea i le labour. Ia e taga eseese lava finagalo ma manatu ua faaalua ae o lau matau i ai o le 13 tausaga lea, a tuu atu i le tulaga o le faavasegaina o aoga, e pei lava o le Yr 7 po o le Yr 8 o lea e Primary School lava le tamaitiiti. Ia o le taimi tonu lea ua amata le tuputupu ae o le tamaitiiti. E na o le pau le tulaga foi lea o lo o tapena, faafetai o lea ua i totonu o le Tulafono Autu, o le teuteuga.

Ae o se fautuaga foi lea i le tapenaga o regulation, aua e i ai le popolega foi lea, aua o le tamaitiiti 13 tausaga lona matua agai i luga, ia o le taimi lea o lo o i ai lava galuega faamatua e aoao le tama aua leaga e le o aumaia i i le faaupuga lea i lau faitau atu i ai, e le o aumaia foi lea aua o galuega masani lava ia a tamaiti ma feau i le fale, e moa le vao, salu le vao, ia fai le saka, e pei e le o agai i ina i le tulaga lea. O le upu lea e sau i i o le employ a tau le employ e totogi ae fai le galuega.

E pei ona saunoa nisi o sui usufono, ina ne i te i ua aveseseina e alo ma fanau, ia a toe fai atu e alu atu e ti mai le ipuvai ia faapea e totogi ae e pei o le tulaga lea o le employ o le tamaitiiti 13 tausaga po o luga ae, o lona uiga e totogi e latou e ana galuega. Ia ae o lea e aumai e tatau ona fai galuega mama e le aafia ai le soifua maloloina ia ma e le aafia ai foi le taimi o le tamaitiiti i le aoga ma lona olaga tuputupuae mo activities foi ia a le aoga e fai.

Ia pau lava la le mea o le tapenaga o Regulations ia malupuipua le tulaga lea, aua e faafaigofie foi lava i e e ana galuega, ia e laitiiti lava si tamaitiiti e auvaivai, ia ae a fai atu lava e sii le ala po o le maa mamafa lea i o, ia o le mea lava foi lena ae e faigata ona... Ia aua a fai e le matua le faatonuga, ia e leai lava se matua e fai se mea e aafia ai sona alo. E aafia ai lona tuputupuae ma tulaga faapena. O la e fai lava le faatonuga ma le agaga alofa ae o le popolega lena ne i te i ua i ai foi nisi ua le o loa e aumai tagata malolosi, ae

ua taumafai e fai tamaiti ma faafaigaluega pe taugofie e laitiiti ai se tupe alu, ia ae aafia ai la tulaga ia.

O le mataituina foi la o tatou Regulation po o Tulafono Faatonutonu, ia ou te iloa o le a tele foi la galuega a tatou Inspectors ia po o Ofisa ia e asia tulaga ia, ina ia taumafai lava e limataitaiina tulaga ia i tatou Tulafono.

O le tulaga lea i tatou working Permits tagata foi lea e le o ni sitiseni Samoa. Ia e i ai le agaga se i silasila pea aua o lea ua i ai le tulaga foi lea e fai le visa, ia fai foi lea o lona pemita e sau e galue. Ou te matauina leaga o nai tausaga talu ai sa ou totogiina ni pemita e toafa mai Ausetalia mo se galuega foi sa feagai ai, ia e ova ma le \$10,000+ le Pemita lea. Ae i ai tulaga foi ia ou te iloa e tatau ona maioio lelei i totonu o Regulation, ia aua a sau e pei o le umi o le pemita e pei e lua tausaga o se mea faapena. Ia a o lea la ua totogi e ita le Pemita e aumai ai le tagata galue lea, ia ae sau toe alu fai galuega a le isi tagata i totonu lava o le piriota lea. Ia atonu o se fautuaga, afai e toe alu e galue i se isi galuega i totonu o Samoa, toe totogi se isi Pemita e le new employer. E maua ai foi ni tatou seleni i tulaga faapena. Ae le faapea o lea na totogi e le isi ae sau tietie ai fai le isi galuega aua o aiaiga uma na ou te iloa o la e i totonu o Regulations, ia ae o lona faamamaluina ma tulaga na, ia se i mataitu ane pea le fautuaga na e tuu atu i lau Afioga i le Minisita e tusa ai ma le Tulafono.

O le... e i ai le vaega lea fesili atu ai, e i ai le tatou Fono Aoao faa-tafatolu lea e tau o le Tripartite Forum, lea e i ai vaega foi lea o le Tulafono tuai, o lea e pei e faamaonia e Le Ao o Le Malo i le fautuaga a le Kapeneta aua e 12 sui usufono, 4 sui mai i le Malo, e 4 sui mai i Faalapotopotoga Employers po o latou e ana galuega, ia ma le 4 sui mai i Faalapotopotoga o Tagata Faigaluega employees.

Ia na o le pau si faafesili lau Afioga i le Fofoga Fetalai e tauala atu i lau Afioga i le Minsita, ia po o a ni atugaluga foi lea o lea ua sui ai le faamaonia e Le Ao o Le Malo o sui ia. Ia aua o lea ua aumai nei e pei ona avatu o sui ia taitoafa mai vaega eseese ia ae o le suiga lea ua aumai nei, ia o lea ua avatu lava ma faamaonia e le Kapeneta ia ma gata ai lea i i. Ia pei e i ai se tulaga tuga pe o se mea foi faapena, ua le faaauau ai pea e pei ona i ai le Tulafono tuai, ia o lea sa faamaonia ma sainia e le Ao o Le Malo.

Lau Afioga ua tatou oo mai i le tulaga lea i mea tau livi. Ia faafetai o lea e i ai tulaga ia i livi Annual Leave ma Sick Leave. Ia o la foi ua i ai lava le aiaiga foi lea e Prorata le faiga foi lea o livi aua o mea foi faapea, ia a tatou le malupuipua foi, ia e popoto lava tagata galulue foi e kami ai i le tamai cap lea. Ae o le taua o le proportionate ina lea o le tulaga lea i le prorata, ia aua e i ai le isi faatoa faigaluega nei ae apply mai le livi i le vaiaso lea e fai lona faalavelave, ae te i ua uma atu lava ma alu ai lava ae o lea ua totogi le vaiaso ae o lea e le o faia se galuega. Ae manaia o lea seiloga e atoa le 12 masina, ia faatoa entitle lea i lana 10 livi. Ae o le faaaogaina foi lea i le

advance, ia o lea e i ai le rate foi lea o lau iloa afai e 10 livi i le tausaga, lona uiga e tasi le masina toetiiti ato le livi e tasi ia e fua i ai le tulaga lea.

Ae e pei e agai tonu se faamatalaga i maternity, maternity leave ma paternity, livi lea mo tina failele aemaise foi le tama o le pepe. E agai se faamatalaga i tulaga foi lea, tele ia o aoaoga mai i le Koviti-19. O lea ua o tatou iloa nei e mafai lava ona faatino nisi o tatou galuega, galue mai i le fale i tulaga lea o le remote, remote arrangement foi lea e galue mai le fale nisi o le aufaigaluega. Afai o lea ua mafai, ia e na o se fautuaga ma se tuualalo, aua e pei lava o le tulaga lea e 8 vaiaso o le maternity ae tasi le vaiaso o le paternity po o le livi lea mo le tama o le pepe. Ia ae 8 vaiaso mo le tina o le pepe.

Pe le ono i ai se consideration foi lea e tuu atu i ai se vaega foi lea e faapea po o le isi 4 vaiaso e 12 ai vaiaso, e mafai ona galue remote foi lea o lona uiga e galue mai i le fale ma asi mai le galuega ma mea faapena. Ia aua o le 8 vaiaso lea o lona uiga e matua le sau lava i le galuega. E matua le sau lava i le Ofisa ae tuu atu ai se isi 4 vaiaso aemaise lava le taimi lea faatoa afuafua le pepe i lona tuputupu ae ma e manaomia lava le tele o le taimi o le tina e faapena ona faafailele lelei. Ia e faapena foi la tama afai pe tasi le vaiaso e tatau ona nofo lelei i le fale e fai feau a le failele ma le pepe, ia pe tuu atu i ai se vaiaso se tasi o le paternity e galue remote le ituaiga arrangement lea ua o tatou maua mai i lenei taimi o le Koviti-19 ma galuega ia ua mafai ona o tatou faatinoina faapea. E ui lava ina le toatele nisi i le Ofisa e faatino galuega, ae o la e mafai ona galue mai e faaoga ai foi le technology le tulaga ia i metotia faaneionapo, ia ua mafai ona fai fononua e fononua mai lava i le fale, ia ma fai lipoti ma lafo mai ma tulaga uma faapena. Ia e pei o nai tulaga ia foi lea e na ona avatu foi o se tuualalo

O le isi vaega e i ai le vaega fou lea ua tuu i totonu o le tatou Tulafono o lea e faapea, employers not to impose a fine. E i ai le tulaga na o le faasaina o sala tupe mo amioga le tatau matuia. O amioga le tatau matuia tusa o le serious misconduct lea o le tagata faigaluega. Ia e pau le tulaga foi lea e avatu pea faafautuaga, afai la e faasaina le faasala tupe o le tagata faigaluega, e faapefea le tulaga foi lea, ia, faataitaiga o le a avatu faafaataitaiga e tau faafaigofie ai na faamanino le tulaga lea.

Ia aua a pei a i ai loa le tulaga lea ua faaletonu le galue po o se mea sese po o se amioga le tatau matuia a le tagata faigaluega, lona uiga ua faamalolo ia po o le a lava. Ia a o lea e pei e aumai e le Tulafono, e faasa ona tuu i ai ni faasalaga tupe. Ae o le tele foi o isi mea ia, e pei ou te tau mafaufau foi lea e pei ua alagatau ona tuu pea i ai sina sala tupe. E pei o se faataitaiga foi lea e tau faafaigofie, o le tulaga lea pe a faapea o le tama faigaluega e sue atu o la ua alu i le taavale a le Ofisa pe a, alu atu lavea ai le taavale, ae uma ane, e le i authorise ina e leai se laisene e alu ai i le taavale, na lavea lea o le taavale ona ave lea toe fau, ia fai atu le faaiuga a le Pule, e totogi e oe le afa o le faiga o le afa o le taavale, ae e totogi e le Ofisa le isi afa. Ia po o le

impose ina la lea o le tupe e tipitipi a faapea o le totogi e \$200 i le vaiaso, ia a faapea e tuu mai le \$10 po o le \$20 e togitogi i le vaiaso, e tau kava ai la le expense lea po o le property lea a le Ofisa.

Ia e pei o le tulaga lea e aafia i lalo o le vaega lea. E pei o se tulaga lena e avatu pea faafesili, aua e taua foi le aiatatau a e e ana galuega ina ia taumafai e paleni. E moni foi o lea e tatou te puipui i aiatatau a latou o e galulue, ia aemaise foi o le aiatatau a e e ana galuega, ina ne i te i... o lona uiga afai lava la o le tulaga lea i mea foi ia e talafeagai. Ia o lona uiga a faapea e lavea loa le taavale faamalolo loa, ia a o la e i ai le avanoa e toe tuu i ai se avanoa ona ua sasi foi i lea taimi ua oso atu lava alu i le taavale lavea mai. E pei o se faaitaiga na o se mea foi lea e tau faamanino ai le agaga o lo o taumafai atu ai lenei sui usufono.

FOFOGA FETALAI: Ua maea le taimi o le sui usufono.

Afioga FUAAVA SULUIMALO AMATAGA: Ia, lau Afioga o lou iloa e toe pau lava lea o si mea lau Afioga e te finagalo malie, o le tulaga lea o le Sunday works. Ia po o se mea foi lea na oo a tatou sailiiliga, ia e manatua a tau loa le Sunday e T2 e faaluaina le totogi o le tagata. A o se tulaga foi lea ona faapea o le aso lea o le Aso Sa, ae pe faapefea la isi Ekalesia.

Ia e faamalulu atu o le a ou taua pea le Aso Fitu ona o le Ekalesia lea o lo o faamamalu pea le latou Aso Sa i le Aso Toonai. E ono afaina pe a faapea e liliu e latou ia e faa-T2 le latou Aso Toonai pe a faapea o e galulue i totonu o Ekalesia, ia faapea e galue i Aso Toonai ia T2, ae a galue i Aso Sa, ia e pei o se aso lea e normal ia latou e T1, ina ne i te i ua i ai se tagata foi lea e galue ai i se Ofisa pe a faapea o i ai se mea faapea o tulai mai. Ia na o le pau lena o se tulaga foi lea e avatu pea faafautuaga ne i te i ua tulai mai, a o lea ua avatu ai ni motugaafa a lenei sui usufono.

Faafetai i lau Afioga mo le avanoa. E i ai nai mea laiti ia e i i, ia ae se i uma ou musumusu atu i le Minisita pe a ma feiloai foi i le malae tapolo i se taimi. Ia ae faafetai tele mo le avanoa aemaise foi le faafogofoga mai a Samoa, si ou itumalo. Ia pau lea o nai vaivaiga ma se faatauvaa lea ua avatu o le tatou sao lea mo le tapenaina o le Tulafono.

Manuia lau Afioga, manuia le Fonousu a Samoa, faafetai.

FOFOGA FETALAI: Faafetai, malo le saunoa faaaloalo. Ia e talitonu lea ua maua lelei mai e le Afioga i le Minisita. Ia o se taimi foi ona faafogafoga lea i le saunoaga a le Minisita e faamalamalama itu uma e pei ona e saunoa. Ia ae faafetai mo lou sao taua.

Ia o le avanoa lenei mo se tasi o sui usufono mamalu o le Maota. Ia o lea ua matau atu o lea ua fou mai le sa o le sui usufono mamalu mai Vaisigano Nu.1. lau Tofa Niuava, lou avanoa lea.

Afioga NIUAVA ETIL. MALOLO (Vaisigano 1.): Faafetai i lau Afioga i le Fofoga Fetalai. E manatu foi o lea ua faavailolo le paia i le Palemene ma le Fonousu a Samoa. Faafetai mo le galuega i lenei taeao, ua maea foi ona tea saouila aua le taiala, Lona Agaga e taimua i lenei faamoemoe ma le Fonousu a Samoa.

E faatalofa foi i lau Afioga i le Tamaitai Palemia, aemaise foi o Minisita o le Kapeneta, afifio foi Afioga i Minisita Lagolago. E faafeiloai foi i le Afioga i le Taitai o le Itu Agai, Sui Taitai ma le mamalu faaepa o sui usufono mamalu foi o lena Itu o le Palemene.

E faatalofa foi i le faafofogaaga a Samoa, mai lava i le matafanua seia paia ia le siuofanua na tauiloa ai manu o malo. Vaeane le paia o Samoa, ia e manatu o le a ou le toe ta i utumau pe ou te toe asaasaina le vaofilifili aua o paia ma sa e tumau e oo lava i le faavavau.

E faatalofa foi i si ou itumalo Vaisigano Nu.1 o faapea foi ona tapuaia le Fonousu a Samoa. Ae le gata i lea, o le tulaga foi o lo o i ai le latou sui usufono ua faapea ona o latou tusilima i ai e momoli le tofa a le itumalo. E ui lava ina lagia foi Faletagaloa, Falefaaea i le valaau paia foi a le Atua i se tasi foi o tulatoa ma tulafaasausau o le Toalima, lau Fetalaiiga Paiaalii Lafaitale Maaolelua, ae manatu ua malama ulugalu e faataoto e le Atua lo tatou alafua na te aumai ia ma faapea foi ona Ia toe aami pe a ua maea galuega na aumai e le Atua e faatino.

O le mea lea e momoli atu ai le tulaga foi o lo o i ai le paia o aiga, ia faamaise pea le Atua e le gata i aiga, o fanau, o le nuu aemaise foi o le itumalo. O se tasi foi o toa manumanu e le gata i totonu o le galuega faafaiaoga, ia ae o se foi sa fesili i ai le tofa le paia i le Toalima, Safune, Tapu ma Lealiifano. Ia maua pea le mafanafana o le Atua.

Ae ua ou tu atu i lenei itula e fia maua foi se avanoa se i o matou ooloolopitovaa aua foi le Tulafono e pei ona folasia i lumamea, i tulaga e pei ona i ai le Tulafono o le Teuteuga o le Tulafono o le Sootaga Va Lelei o Leipa ma Galuega 2022. E momoli le agaga faafetai o lenei foi sui usufono i le Afioga foi i le Minisita aemaise foi o le Minisita Lagolago ma le Afioga i le Ofisa Sili o Pulega, aemaise foi o le Matagaluega i le faamaite i mea lelei. Ia aua e i ai lava upu a le atunuu, ia o le fuata lava ma lona lou, o le taimi foi ma lona suiga, o le pito foi ma ona mafaufauga. Ua tatou i ai foi i lenei vaitaimi ua tatou talanoa i le tele o suiga o le tau. Ua tatau foi ona agai suiga e fua foi i suiga ua agai mai, e le gata i totonu o tatou galuega, ae o le siosiomaga o lo o faapea ona soifua ma ola ai.

O le taua tele o lenei Tulafono i lou foi ia i lou nofonofu atu, e faamanino ai le va feagai ai o le tagata faigaluega ma le tagata e ona le galuega. Aemaise foi o lea ua tatou faalogo i iuni, e pei ona i ai nisi sa i ai i na vaitaimi, e pei o le PSA. O lea foi ua i ai isi iuni ia ua amata ona foufou mai. E pei o le aoga lena o le Tulafono lenei, ma le teuteuga ua aumai e le Afioga i le Minisita, e toe tatala aloaia tele ai, ma toe faamalamalama nisi o vaisua e le o manino i

tagata faigaluega. O i foi e faailoa ai ma faamanino ai le right o le tagata faigaluega. Aua e le na ma le laina ua tuanai atu foi i na tausaga ua tele sue ua agai mai i le Malo i na foi vaitau a tagata faigaluega. E oo foi la i lenei vaitau o la foi ua i ai nisi o... o tagata sa faigaluega sa fai ma poutu o galuega a le Malo aepeitai o lea ua toe agai mai e ave le Malo i totonu o le fogalemalo. E mafua, ona sa tataua ona manino lelei le faataotoga o le Tulafono lenei, e pei o le taua lena o le tulaga foi ia aua nei i ai se faasinoinomaga pe faasinoinomia. E le gata i le Malo ae le gata foi i lea o pisinisi tumaoti. Aua e taua tele lenei Tulafono ma ona teuteuga. E faafofoga mai foi le itumalo, ona o le toatele o tagata faigaluega e faigaluega i pisinisi taitoatasi a tagata, o faletalimalo. O lona uiga o le faapupulaina lea o le Tulafono lenei, ina ia malamalama lelei le tagata faigaluega i le tagata e ona le galuega ma ona aiatatau ma ona rights, e galue ai. A maea le galuega pe tulai mai se faafitauli, a o lea ua taoto lelei le aulape e malamalama o le vaega lea e oo i ai pe a faapea e tupu mai se pefea.

E taunuu mai foi i totonu o le Matagaluega, e feoloolo lava nai issues tetele i nisi o mataupu. E pei e agai i tatou alo ma fanau a le atunuu o lo o agai atu e galulue i luga o vaa i atunuu i fafo. E oo mai i le taimi lenei, o lo o taoto pea le isi issue o le tamaititi na le iloa i luga o le vaa o se alo ma fanau a le atunuu. Ae oo mai lava i le aso e le i maua lava se faamanuiaga a le aiga, aemaise o le toalua, ae le o iloa po o fea o i ai le tagata faigaluega, sa agai e faigaluega i luga o le vaa, fai mai ua leiloa. O i la e ese le taua, o lea la e feteenai le tagata e ona le galuega ma le atalii ua maluu ma matua o lo o faapea ona i ai pea le tiga o le misia o le fanau, leiloa po o fea o i ai. A o lea e taofiofi pea penefiti a lenei tamaititi e le i maua.

E pei o le agaga lena ua avatu ai se faataitaiga lea, e taua tele le malamalama o le tagata faigaluega, aemaise lava tatou tagata la e i fafo. E tataua foi ona malamalama tagata faigaluega, i latou e ona galuega e pei ona agai atu i ai alo ma fanau o si o tatou atunuu. O a ana eligibility e na te maua pe a faapea ua tupu ai le faafitauli. A o alo nei ma fanau e tetele tupe i le vaavaai atu i konekarate sa oo i ai le matamata foi ma le sailiiliga e le faitau i ni afe tupe e maua e tele tupe e maua, e tetele tupe e maua a nai nei alo ma fanau a le atunuu. Ae pei o i lea e i ai le vaisua lea, e le o manino le faataotoga i le mea e tupu mai, aua o le mea e tupu nei, e toe tupu foi taeao.

E momoli le agaga faafetai, e le tele se lagona o lenei foi sui usufono i le tulaga o le Tulafono. O le isi vaega e fia ave faa-fautuaga i le Afioga i le Minisita aemaise foi o le Afioga i le Ofisa Sili ma le Pulega, se i toe tagatagai lava i le mea lea o le translation, from Samoan vocabulary agai i le English translation. E pei o i lea e i ai le vaisua lea e ala ai ona feteenai i le faa... A tilotilo nei i le faa-Peretania o le malamalama ia ma le faigofie o le Tulafono, ae tatou ta loa i la tatou gagana, e pei o i lea e i ai le tatou feteenaiga. Aua e tau loa le upu faigaluega, e pau lava le mea e oo i le mafaufau, o le tagata faigaluega. A i ai la se tatou upu e sui ai le upu faigaluega o le tamaitiiti 13

tausaga, aua o le vaavaai atu lea i le Tulafono, e pei e ese le level o le galuega, o lea e fai mai o le galuega mama. A i ai la se tatou upu foi lea lau Afioga i le Ofisa Sili ma le Pulega e sui i ai le upu lea faigaluega instead of faigaluega, aveane se isi upu, e pei e tatai ese ai le lagona lea o le atunuu ma le Palemene. Aua a silasila foi i saunoaga foi ma tuleiga i lenei taeao, e pei o i lea e agai i ai le lilifa o le upu faigaluega mama ma le faigaluega mamafa. E masalo o lea e alaala foi i totonu o le Maota lenei nisi o tulatoa foi e lava lo latou silafia, i le mea lava lea o le translation o upu faa-Samoa. E taua le fafau... o lou foi ia lagona, e taua lava lo outou fetagofi lava o outou e fau ni a outou lava upu i le tulaga e fai ai la outou faamaumauga, e te alu lava la ma e soifua, e te toe foi lava po o fea le mea e agai i ai, e te vaai, o lau upu lea na faa-Samoa.

O le faaitaiga o lau tala, e i ai le vao lea e masani ona faaoga e le Matagaluega o le Siosiomaga, e taua faa-Peretania o le vertiver, lea e toto e faaoga e Niu Sila e stabilize ai a latou auala, mai le steepness foi lena i autafa ma laufanua solo, e oo mai la iinei i Samoa, e leai se igoa faa-Samoa sa i ai i na vaitau, i taimi o galue foi, ae na ou tago lava lea o au fau le igoa Samoa. O le igoa Samoa la e ua tauave ai lava le vao lea o le vertiver, o lea ua taua faa-Samoa o le usovai. Ia, a i ai se isi e fia malamalama i le uiga o le vao lea o le usovai, o au e ona le igoa. O la foi ua faamau i lalo o le Matagaluega, copy right, e leai se isi igoa o le igoa lea. O le taua, ae i ai le uiga, e i ai fact e support ai lau galuega, ma le faauigaga e ala ai ona faaigoa le vao lea, o le usovai. E pei o i ina lea e tau tatai i ai se lagona lau Afioga i le Minisita ma le afioga foi i le Ofisa Sili o Pulega. E pei o le isi lena tau tilotilo atu... o le Tulafono ia o le faigofie ia, e taua foi lona aumaiga, ae pei o si lape lea e pei e tau feteenai ai ma tele ai le lagona, o le translation from English into Samoan. E pei o i ina lea e tau avatu ai lau Afioga i le Minisita, ina ia maua ni upu lelei, e faamatala ai le Tulafono ina ia taoto lelei. E pei o i ina lea e tilotilo atu ai foi, e pei o le upu lea o le sexual harassment lea e aumai i totonu o le Tulafono. A o lea e, tulou lava foi le gagana ma le le iloa tautala, i le upu o lo o faaogaina, o le faiaiga faasoesa. Ia, afai o le upu lea o lea ua pine, faamauina, ae i ai ni facts e support ai le upu lea faiaiga faasoesa. Ia ua tatou iloa uma lava lenei upu o le faasoesa. O le tiususu that's faasoesa, o le pisa, o le faasoesa. Afai la ua i ai, po o a lava ni upu e lagolago ai le mau lea o le upu sao lea, e taua tele le iloa e le atunuu o le vaega lea.

Tofa Lealailepule Rimoni Aiafi: Lau Afioga i le Fofoga Fetalai.

FOFOGA FETALAI: Ia fai maia sina malologa a lau Afioga i le sui usufono ae se i tulai mai Faleata 3.

Tofa Lealailepule Rimoni Aiafi: Ia faafetai i lau Afioga mo le avanoa, ua faalogologo foi i le tualalo a le Afioga i le sui usufono mamalu. E ese le

manaia, ou te lagolagoina lona finagalo lea i upu faa-Samoa, o lea foi la ua tatou faalogologo o ia e ou le upu lea o le vao osovale. Ae manatua e i ai le nauna lautele, e i ai ma le nauna tautino. Aua a talanoa loa i le vao osovale, lona uiga ua general, so o se vao. Ae a talanoa foi lea po o le vaofefe, vaotui, ona faapea lea o le nauna tautino, ne i te i ua sese atili ai le tatou mataupu. Ma le faaaloalo lava faafetai.

FOFOGA FETALAI: Ia, leaga o lea ua e toe oso mai i le vaofefe a o lea ua tatou oo i i i le sexual harassment. Ae tulai mai le sui usufono mamalu e toe faamanino mai.

Afioga NIUAVA ETI L. MALOLO: Ia faafetai i le Afioga i le sui usufono mamalu. O le Afioga foi i le sui usufono mamalu o se uo mamae foi, ae ese lava le vao osovale lea. E le o le vao osovale lea na ou fai atu ai, o le usovai, o le usovai. Ae leaga o le sui usufono mamalu, o lona ia lava lea naunautaiga, e leai, tulou. E leai e le o le osovale, o le taumafai e aumai se lagona ina ia maua ai lagona lelei, ae le o le osovale, e leai e sese le upu lena, ae faafetai mo le fesoasoani mai.

O le tulaga la e pei o le... aua o lea e maua i le lipoti lea o le apparel of the international labour affairs, lea sa faatino iinei i Samoa i le 2000 ma le... lea na publish ia Aokuso i le 2008, o le manaia ia o le lipoti lea, na ou faitau ai lava i lenei vaiaso i le taotoga, e taua. A e tilotilo foi i ai i le faamatalaga o le 15 tausaga la e i ai o le tamaitiiti, le age, le limit age e faigaluega ai, o le manaia ia o le faaupuga la e i ai, o lo o manino mai ai galuega mama ia. Ae a e refer loa i le tatou context lea faa-Samoa, o i ina o lo o i ai si vaega lea. Ai ona o le tatou atunuu i lana gagana foi ma le... i le tulaga foi i le gagana, ae i ai lava nai vaega foi nei ina ia mafai ona differentiate ia upu e manino ai, ma mafai ona iloa ai le momoliga mai o le feau.

Lau Afioga i le Fofoga Fetalai, pau ia o nai manatu foi e faufau ai le sa folau foi o le Afioga i le Minisita aemaise o le Ofisa Sili o Pulega ma le Matagaluega. E momoli le agaga faafetai i le taulagalaga foi ona o mea ua tutupu i lenei vaitau, ua tatau ona sui, ua tatau foi ona ave i ai se lagona e tilotilo lelei i ai, i le tulaga e mafai ai ona fetau lelei ma le tulaga ua oo mai i lenei taimi.

Ia manuia tele lau Afioga i le Fofoga Fetalai aemaise foi o le alo atu i lenei vaiaso e faamanatu foi le taua tele o lenei vaega o tina i lana ia galuega i totonu o le tatou atunuu. Ia manuia tele le Aso Sa o Tina i tina uma o Samoa mai le usugafono a Vaisigano 1. Manuia foi tina o si ou itumalo, ia tatou feiloai i le Aso Sa o Tina. Ia manuia le Fonotaga manuia le Fonousu a Samoa.

FOFOGA FETALAI: Ia malo faafetai mo le sui usufono mamalu o Vaisigano 1 mo lou finagalo ua faaalua. Atonu o lea foi ua maua lelei mai e le Minisita aemaise foi le Maota, nisi foi o fautuaga e pei ona tuuina mai.

Ae lelei pea le avatu o se faailoa a le Nofoa e tusa o le Faaliliuupu o tatou Tulafono ona o le Ofisa o le Fono o lo o galulue i le faaliliuina o tatou upu o le Tulafono mai le Gagana faa-Peretania i le tatou gagana. O lo o i ai foi ia tulaga o terms e faaoga, upu ua faatulafonoina. O lo o i ai isi Tulafono o lo o ua mafai ona suia ai upu sao, ae na ona faailoa atu pea i le sui usufono, ne i te i foi ua maua mai i se saunoaga, ae o le agaga lena o le tatou Ofisa o lo o taumafai lava e faaoga tatou Tulafono faaliliu e faaliliu ai foi a tatou upu. Ae aoga foi le fautuaga, o lea ua taatia mai, o lea ua faalogologo atu le Ofisa, mo le agai i luma. Ia malo lava saunoa i le sui usufono mamalu mai Vaisigano 1.

O le avanoa lena i se tasi o sui usufono o le tatou Maota. Ua ou vaai atu ua malilie uma sui usufono o le Maota i le Tulafono. O lo o maua pea le avanoa sui usufono mamalu i le tatou Tulafono. Ae taua foi lena Tulafono mo le tatou atunuu aemaise o le aufaigaluega mo le agai i luma o aiga.

Ia, o lea ua matau atu ua fou mai le sa o le sui usufono mamalu mo Falelatai ma Samatau. O le avanoa lea o le sui usufono.

Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau): Faafetai atu i lau Afioga i le Fofoga Fetalai mo le avanoa, e manatu foi ua maua se faasiligamalosia i lau Afioga ma le paia maua o lena Fonotaga i se taligasua i le taimi ua sola. Ae matou te auai faatasi foi i le viiga ma le faafetai e pei ona siitia e lau Afioga i le taimi ua sola i le alofa ma le agalelei o le Atua ua mafai ai foi ona tatou aulia mai lena aso Fono, aemaise o lena aoauli.

Ae ua ou tulai atu i le ava ma le faaaloalo, e fia faaoga foi lena avanoa e avatu ai foi se sao o lena itumalo i le Tulafono Tau Faaofi o le Teuteuga o le Tulafono o Sootaga Va Lelei o Leipa ma Galuega 2022 e pei ona i ai i le Maota o le Palemene.

E faapai atu foi i lau Afioga i le Fofoga Fetalai faapea foi sui usufono o lena Palemene, aemaise le Afioga i le Palemia, ma le Kapeneta e faapea foi Minisita Lagolago ae tainane foi le Afioga i le Loia Sili ma le Ofisa o le tatou Malo ua mafai ona tatou faatasi i lena vaega o le aso, e faapea foi le tapuaiga a Samoa, Le Ao Mamalu o le Malo, Sui o le Fono o Sui Tofia, faapea foi le Faamasino Sili ma le Ofisa o Faamasinoga, ae le gata i lea o Samoa aoao, aemaise o le aufaitatalo o lo o faanonomanu aua se manuia o lo tatou atunuu.

A o si ou itumalo o Falelatai ma Samatau, ia tapuai maia se i taumafai so tatou sao i le Tulafono ua i luma o le Maota o le Palemene. E momoli atu le faafetai tele i lau Afioga i le Minisita faapea foi le Ofisa Sili o Pulega ma le Matagaluega, ona o lena Tulafono taua. O se Tulafono i lau vaavaai, e

faataua ona o le Tulafono lenei e limataitaina ai le faatinoga lelei o galuega e le gata i le Malo ae faapea foi pisinisi ma atinae o lo o galulue ai lo tatou atunuu. Ou te manatu o le Tulafono lenei e le gata e manomia e tagata e ana galuega le aufaigaluega, ae faapea foi le aufaigaluega i tagata e ana galuega. O se sootaga taua tele e tataua ona vaavaai totoa i ai, mo le faafoeina lelei ma le malupuipua aua se manuia o le tatou atunuu.

I lau vaavaai i le Tulafono, o le tele lava o nisi o vaega o lea ua maea ona saunoa i ai nisi o sui usufono, ou te manatu la o le a ou le toe asa le ogasami lena, ae i ai nisi o vaega faatupu manatu.

I lau vaavaai i le Tulafono e le o iloga lava ona manino lelei ona aumai e le Tulafono le eseese o le mea lea o le totogi itula po o le wage ma le totogi i le tausaga, salary. E manaia le aumai manino i le Tulafono ina ia manino lelei, aemaise lava tagata faigaluega, o i latou e galulue e totogi itula, e agavaa i mea ia o ovataimi. A o i latou e galulue salary po o le tausaga, e le agavaa i ni ovataimi. Ae tataua foi la ona manino i lalo o le Tulafono, o le a le mea e tupu pe a tulai mai ni emergencies. E pei o le faataitaiga o le afa, tsunami, o mea e le masani ai. A o lea e aumai i lalo o le salary e le agavaa tagata ia i ni ovataimi. E tataua ona manino lelei le Tulafono, e tataua ona agavaa tagata ia i taimi faapena e tulai mai emergencies, e pei foi ona tatou i ai i nei vaaitau i le faamai o le Koviti-19. O lea ua taua e nisi ua tataua ona i ai le hazard allowance po o le risk foi ae tataua ona manino tulaga ia, ina ia faigaluega le tagata faigaluega ae ua manino lelei i mea e agavaa i ai.

O le isi itu e fia faamamafaina o le eseese o tagata e faigaluega sifi ma tagata e faigaluega masani e pei o tatou. Ou te vaavaai atu i le Tulafono, e le o tele se faamanuiaga mo i latou o lo o faigaluega sifi. Ae pei ona silafia, o le natura o le tagata e ala ma faigaluega i le ao, ae malolo ma moe pe a oo mai le pogisa. A o lau vaavaai i le Tulafono, e le o tele ni faamanuiaga e maua e i latou o faigaluega ma tautua i itula tuga lea o le aso, o le po. E tofafa ma momoe le atunuu, a o lea lava e galulue i latou nei mo le tautuaina o le atunuu. E tataua ona i ai nisi faamanuiaga faapitoa mo i latou na.

O se faataitaiga o lea e aumai i le Tulafono, a faigaluega le tagata e le sifi i le Aso Sa e faaluaina le totogi. A o le tagata lea e faigaluega sifi, a pau lana sifi i le Aso Sa, e le faaluaina le totogi. O le mea la lea e tataua ona silasila i ai lau Afioga i le Minisita, le Faatonusili ma le Matagaluega, e tataua foi ona fai ni shift allowance, ina ia faatosina ai i latou e faigaluega i taimi ia tuga o le aso, e pei o le po ma le weekend. E pei o se faatupu manatu lena, i lau vaai i le Tulafono e le o lava faamanuiaga mo i latou o lo o galulue sifi, e toatele i latou o lo o faia le galuega lea. E le gata i alii ma tamaitai fomai, o le fui mu o malu o le Malo faapea le EPC ma le Suavai, ma isi galuega faapena.

Tofa Hon Leatinuu Wayne Soialo: Lau Afioga i le Fofoga Fetalai.

FOFOGA FETALAI: Se i fai mai se malologa a le sui usufono. Ia tulai mai le Afioga i le Minisita. Saunoa lau Afioga i le Minisita.

Tofa Hon Leatinuu Wayne Soialo: Ia faafetai lava i le Afioga i le sui usufono mo manatu. Sa le fia faalavelave lava i tulaga o le faatalanoaina o le Tulafono lenei, ona ou te talitonu e faaleo mai pea manaoga aemaise foi tulaga o lo o i ai, o lo o faafofoga mai le PSC, o i latou na e faaulu i ai manatu ia. A o le tatou Tulafono e le lavea ai tagata faigaluega i lalo o le Public Service Commission, e na o tagata faigaluega i galuega tumaoti aemaise foi i latou o faigaluega i lalo o galuega tumaoti a le Malo po o State Owners Enterprise. E leaga o lea ua aumai faafia le manatu lea i le Ministry of Health, ae aoga foi i le faafofoga mai a le Public Service ina ia faamaumau ai manatu ia, e fau ai foi le latou Tulafono, ina ia fesoasoani ai la mo le Ministry ma tulaga faapea. Ae leaga o lea ua tele ina aafia mai le tulaga lea i le Falemai, aemaise foi o tagata faigaluega, ne i tei ua avesese ai e latou, faapea ai o le Tulafono lea mo i latou.

E pei o le faamalamalama lea lau Afioga i le Fofoga Fetalai faafetai lava mo le avanoa.

FOFOGA FETALAI: Ia faafetai i lau Afioga, o lena tonu foi lea sa taumafai atu ai le Nofoa i le taimi ua sola. Ae faafetai o lea ua manino le saunoaga, e le o aafia i latou i le PSC. O lea ua manino mea uma e tusa ai o le faamalamalama. Ia faaauau mai le saunoaga a le sui usufono.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau Afioga i le Fofoga Fetalai, faafetai foi i le Afioga i le Minisita e tusa ai o le faamalamalamaina o le vaega lea. Ae ao lava ona silafia, o Tulafono foi o le PSC e fau mai lalo o Tulafono aoaotetele ia. E pei o le vaega lea sa ou taua ai, e na o ni faaitaiga na e avatu, ae mo le silafia o le tulaga lena o lea e i ai. O le Tulafono lea tatou te talanoaina, e faaoga uma lava le Tulafono lautele, aepeitai faafetai o lea ua faamalamalama mai e le Afioga i le Minisita le isi vailiu lea.

E momoli atu le agaga faafetai i le Minisita o lea ua ou vaai atu ua i ai le suiga ua aveese mai le tele o matafaioi ma malosiaga ia sa i lalo o le Minisita ma le Kapeneta i le Faatonusili. E manatu o se suiga lelei lena, aua o le tele lava o galuega e pei e faalagolago i le Ofisa Sili o Pulega ma le aufaigaluega latou te faatinoina ae o lo o i ai pea le pule faamalumu i le Kapeneta.

E pau le isi vailiu o lea e vaai atu i le Tulafono, e le o consistent le faaogaina o le CEO ma le Minisita faapena foi le lipotiina o faasea, o lea e i ai le isi vaega o le Tulafono, e lipoti faasea i le CEO ma le Labour Inspector. Ae i ai lava lou talitonuga, e lelei lava le tasi o le mea e agai i ai faasea, pe agai i le Ofisa Sili o Pulega, o le Ofisa Sili o Pulega la e tufaina mai galuega i lalo i le aufaigaluega. Aua a lipoti uma loa i le toalu lea, o lona uiga e i ai

le taimi e le iloa ai e le CEO le mea la e fai e le Labour Inspector. E pei tasi lena vaega e tatau ona silasila i ai lau Afioga i le Minisita.

O le taua foi o isi vaega ia o le soalaupulega foi lea o mataupu pe a tulai mai ni faafitauli, e tau tuuititia ai le oo o mataupu i le Faamasinoga. E pei ona ou taua i le taimi ua sola, o le taua o le Tulafono lenei, ia mafai ona galulue faatasi ma soosootauau faatasi le e ana le galuega ma tagata faigaluega. A tulai mai la se faafitauli, e tatau ona i ai se mea e mediate lelei ai faafitauli e tulai mai, e aveesea ai foi le oo atu o le tele o tatou mataupu i le faamasinoga e pei foi ona matauina i le taimi nei.

O le isi vaega taua e ao ona silasila i ai lau Afioga i le Minisita ma le Matagaluega, ua manaia o lea ua aumai i lalo o le Tulafono, e leai se malosiaga i le e ana le galuega, e toesea mai ai ni deductions mai le totogi o le tagata faigaluega. A o le mea lea ou te vaavaai i ai i le taimi nei, pe mafai ona silasila le Matagaluega, i le tulaga lea, o le isi tagata faigaluega e uma lelei lava le totogi o tipi i aitalafu, ae leai se mea e ola ai le tagata faigaluega. A o le rule of thumb i le faiga o mea na, e tatau lava ona i ai se portion po o se pasene o le vaega o le totogi o le tagata faigaluega, e tuu e ola ai. A o le mea lena e ala ai ona tele faafitauli e tulai mai i lea taimi i lea taimi. Ua le iloa e le tagata faigaluega po o fea a fesulufai i ai i taimi e tulai mai ai faalavelave faale-aiga, ae tatau ona i ai se system lelei e coordinate lelei ai, po o fea lava le mea e te agai i ai e fai ai sau aitalafu, e alu atu o la e maua uma faaumauga i ina, ina ia mautinoa ia saogalemu le faiga o aitalafu.

O le tulaga e pei ona manaia foi le aumaiga o le Tulafono i le agaga lava lea ua i ai le lalolagi o le aia tutusa o tamalii ma tamaitai, o le gender equality. Ae mo le silafia, po o le a lava lo tatou taumafai e faatutusa mea ia e lua, e le taitai lava ona tutusa, ioe. Ae ao ona vaavaai i agavaa, e eseese foi galuega, ae le faapea o le a taumafai lava e faatutusa lava le remuneration o genders ia e lua, leaga e i ai lava galuega e le gafatia e le isi itupa ona faatino. So, e le tatau foi la ona vaai pitotasi, e moni, faafetai o lea e faatua le aia tutusa o tamaitai ma alii i galuega, ae i ai lava vaega e ao ona silasila totoa i ai, e le tatau ai ona faatutusa.

O galuega faavaitaimi, faafetai o lea ua saunoa nisi, ae ou te lagolagoina foi le tuu i tua i agents latou te faafaigaluegaina tagata faavaitaimi.

O le isi vaega sa ou vaavaai i ai, ia ai ona o le Matagaluega lea o lea e nafa ma le Va i Fafo, a o lea foi e faafaigaluega e le PSC tagata faigaluega uma a le Malo, a o lea la e faafaigaluega e le MCIL tagata faavaitaimi. Ia ai ona o le tulaga lena, o latou e nafa ma le va i fafo. Ae tatau foi ona silasila i ai pe le alagatau ona tuu uma i lalo o le PSC le faafaigaluegaina o tagata uma.

Ia ma le isi vaega taua o lea foi ou te vaavaai lava i ai, ua tatau foi ona faatutoatasi le PSC latou ia mai le Kapeneta ina ia mafai ona latou faafaigaluegaina tagata faigaluega, e aunoa ma se political influence e aafia ai, ia ma malupuipua tagata faigaluega. O le isi lena observation o lo o i ai i le taimi nei, a faapea e mafai ona faatutoatasi le PSC mai le Kapeneta, ia o

se isi lēna suiga taua e vaavaai i ai mo le agai i le lumanai, ina ia aua ne i i ai le fear i le tagata faigaluega i le faatinoina o ona tiute aua se manuia o le tatou atunuu.

O le tulaga o lo o i ai le approval lea a Le Ao o Le Malo ua aveese. Ia, o se suiga atonu foi e i ai ni mafuaaga tataua sa ae ai se tofa i lau Afioga i le Minisita ma le Matagaluega. Ae o se fautuaga a lenei itumalo, e taua lava le i ai pea o le pule faamalumalu lēna a Le Ao o Le Malo, ina ia i ai le check and balance. O le a se mea e misi atu ia outou Afioga i le Kapeneta, a o faapena ona i ai le isi vaega e mafai ona vaai mai ai.

Ma le isi tulaga, e manaia foi le agai i le lumanai pe a faatutoatasi foi Le Ao o Le Malo ia, ina ia aua lava ne i i ai le fear lava lea i le faatinoina o galuega, a mafai ona faatutoatasi Le Ao o Le Malo, fai sana ia loia, tutoatasi lana opinion ma le avatu i ai o le Tulafono ma vaavaai i ai, ia o se tulaga lelei foi lēna.

FOFOGA FETALAI: Ia, onosai mai le sui usufono se i tuu atu i le Minisita se i saunoa mai le Minisita. O lea lava e tau puipui atu tatou folasaga agai i le Tulafono.

Saunoa mai lau Afioga i le Minisita.

Tofa Hon Leatinuu Wayne Soialo: Lau Afioga i le Fofoga Fetalai, pei o le agaga lea o lea e taumafai atu ai, pei uma lava o lea ua see ese ma le mataupu lea e talanoaina. Ia o mataupu ia e aumai mai o e aoga, ae pei uma lava e le o i e aumai i ai, ia o lo o i ai foi le auala e faatino ai.

O le isi foi mea, o le anavatau lēna a lenei Vaega Faaupufai o lo o i ai, o lo o tilotilo i le tulaga lēna. Ae faafetai lava mo le mataupu, ae le taulia i i. Ma le faaaloalo lava faafetai.

FOFOGA FETALAI: Ia, o lea foi e tau fesoasoani atu i le sui usufono mamalu, ia tau faalilifa mai le saunoaga agai le tatou Tulafono lea e talanoaina e le Palemene e faafaigofie ai le tatou mataupu.

Ia faaauau mai le saunoaga.

Afioga LUPEMATASILA GALUMALEMANA TOLOGATA TOGIA TILE LEIA: Ia faafetai. O nai motugaafa lava manu o lea e maua le avanoa e avatu ai, a o lēna e i ina le tofa ma le faautaga mamao e fetuutuunai ai aua se manuia o le tatou atunuu.

O le isi vaega e fia avatu i ai se fautuaga, faafetai o lea ua i ai se faamanuiaga e mafai ona totogi a tatou Annual Leaves. A o le tulaga lea e tau atugalu i ai se manatu, o le treat ina po o le faiga lea o aso mai. E silafia foi o lea ua aumai e le mafai ona faaauau aso mai, a o le popolega lea e i ai a oo ina mai le tagata faigaluega, o fea e tua i ai le tagata faigaluega pe a oo ina maua i se mai tuga, e faaumiumi ai ona le maua le malosi e alu ai e

faigaluega, ae pei o i ina e tua i ai le tagata faigaluega. Aua o lea e avatu e moni lava o lea e i ai le tatou ACC, ae na o le 75% lea e mafai ona pay mai e le ACC. Ae a mafai la ona pay atoa le 100% ona manaia lea. Ia o le isi lena vaega faatupu manatu.

Ia pei o se taumafai atu lea a lenei itumalo i lau Afioga i le Fofoga Fetalai, aua le lauiliuina o le teuteuina o lenei Tulafono taua. E avatu foi malu i puega i lau Afioga faapea foi lena Itu o le Maota. O le a foi se gagana ua paovale i la outou faafofoga, e i ai lava le manatu maualuga e vaatele i ina e magalo ai so matou aleu. Ae ia manuia tele lau Afioga i le Fofoga Fetalai faapea le tatou Palemene. Faafetai.

FOFOGA FETALAI: Ua faamalo saunoa i le sui usufono mamalu mai Falelatai ma Samatau, o lea foi ua maua lou sao, o lea foi ua faamaumau lelei e le Afioga i le Minisita itu taua e pei ona laga. O se taimi foi faafofoga i le saunoaga a le Minisita e faalatele ai le finagalo pei ona faasoa mai i totonu o le Maota.

Ia o lea ua matau atu o lea ua fou mai le sa o Anoamaa 1, le sui usufono mamalu, o lou avanoa lenei.

Afioga ALAIASA MOEFAAUOUO MALAGAITUTOGIAI SEPULONA MOANANU: Faafetai mo le avanoa i lau Afioga i le Fofoga Fetalai. E le vavaea le falaooto i le paia o Tiafau, ae a le Maota o le Palemene o Samoa, leaga o lea e afio ai lau Afioga i le Fofoga Fetalai, ae tainane foi le alaala ma papaaao o sui usufono mamalu o le Palemene o Samoa, i le Afioga i le Tamaitai Palemia ma le Kapeneta. Ia ona matou faapea lea, o paia lava ua taoto a o se ala ua oo, e le toe suia foi pe toesea i sa matou faamatalaga. E i ai le manatu o lenei usugafono, ia o le a agai tonu ia i le faamoemoe pei ona taoto i le tulaga o le Tulafono.

E muamua ona ou faafetai i lau Afioga i le Fofoga Fetalai, ua maua se avanoa na tuu mai se i toe auiliili ai le Tulafono ma matou faitau ai. Ia o se avanoa sa seasea foi maua i ia vaitaimi, a o lenei Paeaiga ma lou tulai mai, ia ua lava ma totoe le faamoemoe ua tuu mai e auiliili ai Tulafono, aua e i ai taimi ua amata ona tau sese Tulafono, a ua maua la le avanoa lenei e sui usufono latou te faitau lelei ai i tatou Tulafono Tau Faaofi ae le i faasee atu i nisi tulaga.

Faafetai foi i le Afioga i le Ofisa Sili o Pulega, ona o le pepa lea ua matua auiliili mai ai le suiga lea o le a fai ma le Tulafono tuai ua fetuunai faapena i le pepa na tuu mai e le Matagaluga e tauala mai i lou Ofisa ua lava ai a ma totoe se faamalamalama ia ua maua i lenei Tulafono.

Ia, e le umi sa matou faamatalaga, o lea ua aofaga manu i finagalo o sui usufono na sausaunoa. Na pau lava lea e momoli atu le faafetai i lau Afioga i le Minisita. Afai foi na saunoa lenei Itu na amatamea lenei Itu i le Tulafono,

ia o lea ua e tulai mai ua aumai i luma o lumamea, lea ua aumai i luma o le mea e fai ai le filiga ina ia avea ma Tulafono a si o tatou atunuu.

O aotelega lava o lenei Tulafono, e lilifa i le manuia o tagata faigaluega. Afai foi o faafofoga mai le afaigaluega a le atunuu, o le Tulafono lenei e... its like an empowerment mo latou, e avatu ai se malosia fou sa le i i ai muamua mo latou aua le latou va feagai ai ma falefaigaluega ma latou e ona galuega. Ua aumai le malosia i le au asiasi, ua faatulai mai le malosia tele lea, e mafai ai ona latou asia galuega i so o se taimi, faapea ma le Ofisa Sili. Ia o se mea taua pe a faaogata ia tulaga, ae a tele foi le pule, ia ua tele foi ni mea faaletonu e ono tulai mai ai. O le mea lea, e fautuaina lava ia savalivali lava i luga o ala o le Tulafono ma aua le faia faaituau pei ona maua i le Tulafono i ni uiga foi ia e ese mai le tulaga o i ai le tatou Tulafono.

O le isi mea taua lau Afioga ua matauina e pei foi ona taua e nisi o sui usufono, o galuega ia i le aso Sa. E le o se mea fou le mea lenei, o mea o la e i totonu o le Tusi Paia e taiala uma ai Tulafono. O lea la ua tau sosolo lelei ma le Faavae lea ua faavae ai ma faataatia ai le tatou atunuu, a o lo o i ai lava le avanoa e tatala ai mo e e manaomia, galuega e manaomia e tatou. Aua a tatou tapu foi faasoloatoa le galuega, ia ua le mafai ona gaoioi auaunaga e tataua ona fai. O le mea lea, faafetai i le tulaga lea, a o lea ua faamanino mai i le tatou Tulafono.

Ia, o tulaga o nai totogi foi ia o nai o tatou tagata, pei o totogi maualalo, lea ua i ai le avanoa e toe vaiilili ai pe a uma le 2 tausaga. O le taimi nei, pei ua alualu lava faapea totogi maualalo o le Malo, a o lea e i lalo i i totogi maualalo o le tatou private sector, pe afai e sao le mea lea ou te faituina i le taimi lenei i le tulaga o totogi. Ae tataua foi ona faapaleni, aua o le isi itu o le Tulafono lenei, e tele le aafiaga o tagata e ona galuega, a o le mea lea o lea tatou te mananao e matua faamalosi, faamalosi le tatou private sector. E tele foi isi mau mea fou ia ua agai mai i livi, o ai e gafataulimaina ia mea? O tagata e ona galuega. E ono oo le tatou Tulafono lenei, ua malosia le Labour Force ae ua leai ni galuega. Tatou te faapaleni la faapena le mea lenei, ina ia maua foi se avanoa e aumai ai se Tulafono e faamalosi ai tatou tulaga o pisinisi.

Ia, o nai... ua ou fiafia i mea ia ua tulai ai tatou aso malolo mo nai tagata. Ia ua oo foi lava aua e le iloa pe tofua uma lava tatou ma nai tagata foi ia taitasitasi pe tailua e faigaluega, ia o nisi ua nafa ma le vaaiga o le fanau. O tulaga lava faapena lea ua oo i ai le tatou Tulafono lea, e tataua lava ona maioio lelei tulaga uma e tataua ona i ai. O i foi lea e tele ina agai i ai le mea lea o le faiaiga faasoesa po o le sexual harassment. Ia te au foi la ia, e tataua foi ona fai faaeteete nei mea, leaga e i ai lava isi tagata e o e naunau e maua mai se tupe i le tagata lea, aua ua oo lava i le pai, ua oo lava i lou pai i le tagata, ua ave lava oe se i ave i le Tulafono ma ave oe... Ia, ua le toe sefe foi la tatou fale i lenei taimi, ua tataua ona fai ni tatou camera ma ni mea i totonu o tatou aiga, ina ia puipuia ai foi tatou mai... leaga o tagata, e ese foi

mafaufauga o isi tagata i isi taimi, ae tatau ona tatou vaavaai uma i mea ia, ia aua ne i manuia o ae oti ai ma tatou nei. Ae tatou te iloa lava, a sulu mai foi lea e naunau e sue se galuega, o le vaiaso muamua o le matua lelei numera tasi, e faapea, oka, number one le tagata lea. Sau le vaiaso lona lua, tolu ifo ua amata ona le usu mai, a. E faapena uiga o tatou tagata. E fa ifo, ua vili mai le telefoni ae ua le sau, ua ou mai. O uiga la nei, e le ni mea fou, a o mea o lea e tutupu, e tatau ona agai foi i ai ia puipuia le tagata, le employer, puipuia le employer...

FOFOGA FETALAI: Ia, e le uma le fia faalogologo i le saunoaga matagofie a le sui usufono mamalu. Ua oo foi i le ooooga taua o le saunoaga, ae paga lava lea, ia ou te faamalulu atu, ia ona o lea foi ua taunuu i le tatou taimi manava, ia o lo o maua foi le avanoa i le aso a taeao mo le faaauuina o le saunoaga matagofie.

Ia tatou tala soifua i le alofa ma le agalelei o le Atua. Ua o tatou taunuu mai i le tatou taimi manava o lenei aso, ia e momoli atu le faafetai a le Nofoa i le paia o le Palemene i saunoaga o lenei aso. Faamalo le onosai, faamagalo mai foi se sese o le Fofoga Fetalai, pe afai ua i ai se gagana ua sala i lenei aso ma le faatautaiga o a tatou Taulumaga. Tatou talosia ia le agalelei o le Atua i lo outou soifua ma se malosi o le Fofoga Fetalai e faaauu ai le tatou galuega i le aso a taeao.

Mo lenei aso, malo le usufono, faafetai Samoa i lau tapuaiga, alofa faamagalo lau Palemene i se gagana ua le tautamalii i lau faafofogaaga. Alofagia e le Atua le alofaiva o le tatou atunuu i feau o totoe o lenei aso.

Faafetai i auaunaga uma o lo o tautuaina lo tatou Palemene, i le taimi nei ma ana Taulumaga, malo le tautua malo le onosai. Ia ae tatou te le i tolopo e talosaga atu i le sui usufono, le Afioga i le Minisita Lagolago mai i le itumalo o Aana Alofi Nu.3, e saunia se tatalo e faaiu ai le tatou Fonotaga.

Na tolopo Taulumaga a le Fono Aoaofaitulafono i le itula e 1:04 i le afiafi seia aulia le itula e 9:30 i le taeao o le Aso Lulu, 4 o Me 2022.